CBETA電子佛典集成

CBETA Chinese Electronic Tripitaka Collection ebook

T26n1525

彌勒菩薩所問經論

沒魏 菩提流支譯

目次

- 編輯說明
- 章節目次
- 卷目次
 - 001
 - 002
 - 003
 - 004
 - 005
 - 006
 - · 007
 - · 008
- 。009 ◆ <u>贊助資訊</u>

編輯說明

- 本電子書以「CBETA 電子佛典集成 Version 2022. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

No. 1525

彌勒菩薩所問經論卷第一

後魏天竺三藏菩提流支譯

如是我聞:

一時,婆伽婆住王舍城耆闍崛山中,與大比丘眾千二百五十人俱,并諸菩薩摩訶薩十千人等。

爾時,彌勒菩薩摩訶薩即從坐起,偏袒右肩右膝著地,合掌向佛白佛言:「世尊!我今欲以少法問於如來、應、正遍知。不審世尊!聽許以不?」

爾時,世尊告彌勒菩薩摩訶薩言:「彌勒!隨汝心念問於如來、應、正遍知。我當為汝分別解說,令汝心喜。」

爾時,彌勒菩薩摩訶薩白佛言:「世尊!如是願樂欲聞。世尊!諸菩薩摩訶薩畢竟成就幾法,不退阿耨多羅三藐三菩提,於勝進法中不退不轉,行菩薩行時降伏一切諸魔怨敵,如實知一切法自體相,於諸世間心不疲倦,以心不疲倦故不依他智,速疾成就阿耨多羅三藐三菩提?」

爾時,世尊告彌勒菩薩摩訶薩言:「善哉,善哉!彌勒!汝今乃能問於如來如是深義。」

佛復告彌勒菩薩摩訶薩言:「汝今應當一心諦聽,吾當為汝分別解 說如是深義。」

即時,彌勒菩薩摩訶薩白佛言:「世尊!如是。願樂欲聞。」

佛復告彌勒菩薩摩訶薩言:「彌勒!若諸菩薩摩訶薩畢竟成就八 法,不退阿耨多羅三藐三菩提,於勝進法中不退不轉,行菩薩行時 降伏一切諸魔怨敵,如實知一切法自體相,於諸世間心不疲倦,以 心不疲倦故不依他智,速疾成就阿耨多羅三藐三菩提。何等為八? 彌勒!所謂諸菩薩摩訶薩成就深心、成就行心、成就捨心、成就善 知迴向方便心、成就大慈心、成就大悲心、成就善知方便、成就般 若波羅蜜。

「彌勒!云何諸菩薩摩訶薩成就深心?彌勒!若諸菩薩摩訶薩聞讚 歎佛及毀呰佛,其心畢竟於阿耨多羅三藐三菩提堅固不動。聞讚歎 法及毀呰法,其心畢竟於阿耨多羅三藐三菩提堅固不動。聞讚歎僧 及毀呰僧,其心畢竟於阿耨多羅三藐三菩提堅固不動。彌勒!如是 諸菩薩摩訶薩畢竟成就深心。

「彌勒!云何諸菩薩摩訶薩成就行心?彌勒!若諸菩薩摩訶薩遠離 殺生、遠離偷盜、遠離邪婬、遠離妄語、遠離兩舌、遠離惡口、遠 離綺語。彌勒!如是諸菩薩摩訶薩畢竟成就行心。

「彌勒!云何諸菩薩摩訶薩成就捨心?彌勒!若諸菩薩摩訶薩是能捨主、是能施主,施諸沙門及婆羅門、貧窮乞匃下賤人等,衣食臥具隨病湯藥所須之物。彌勒!如是諸菩薩摩訶薩畢竟成就捨心。

「彌勒!云何諸菩薩摩訶薩成就善知<mark>迴</mark>向方便心?彌勒!若諸菩薩 摩訶薩所修善根,謂身口意業,皆悉迴向阿耨多羅三藐三菩提。彌 勒!如是諸菩薩摩訶薩畢竟成就善知迴向方便心。

「彌勒!云何諸菩薩摩訶薩成就大慈心?彌勒!若諸菩薩摩訶薩畢 竟成就大慈身業,畢竟成就大慈口業,畢竟成就大慈意業。彌勒! 如是諸菩薩摩訶薩畢竟成就大慈心。 「彌勒!云何諸菩薩摩訶薩成就大悲心?彌勒!若諸菩薩摩訶薩畢 竟成就不可譏呵身業,畢竟成就不可譏呵口業,畢竟成就不可譏呵 意業。彌勒!如是諸菩薩摩訶薩畢竟成就大悲心。

「彌勒!云何諸菩薩摩訶薩成就善知方便?彌勒!若諸菩薩摩訶薩 善知世諦,善知第一義諦,善知二諦。彌勒!如是諸菩薩摩訶薩畢 竟成就善知方便。

「彌勒!云何諸菩薩摩訶薩成就般若波羅蜜?彌勒!若諸菩薩摩訶 薩如是覺知,依此法有此法、依此法生此法,所謂無明緣行,行緣 識,識緣名色,名色緣六入,六入緣觸,觸緣受,受緣愛,愛緣 取,取緣有,有緣生,生緣老死憂悲苦惱,如是唯有大苦聚集。

「彌勒!此法無故此法無、此法滅故此法滅,所謂無明滅則行滅, 行滅則識滅,識滅則名色滅,名色滅則六入滅,六入滅則觸滅,觸 滅則受滅,受滅則愛滅,愛滅則取滅,取滅則有滅,有滅則生滅, 生滅則老死憂悲苦惱滅,如是唯有大苦聚集滅。彌勒!如是諸菩薩 摩訶薩畢竟成就般若波羅蜜。

「彌勒!是名諸菩薩摩訶薩畢竟成就八法,不退阿耨多羅三藐三菩提,於勝進法中不退不轉,行菩薩行時降伏一切諸魔怨敵,如實知一切法自體相,於諸世間心不疲倦,以心不疲倦故不依他智,速疾成就阿耨多羅三藐三菩提。」

佛說此經已。彌勒菩薩摩訶薩,及餘諸菩薩摩訶薩、比丘、比丘 尼、優婆塞、優婆夷、天、龍、夜叉、乾闥婆、阿修羅、迦樓羅、 緊那羅、摩睺羅伽、人非人等,一切大眾聞佛所說,皆大歡喜,信 受奉行。

彌勒菩薩摩訶薩所問經論卷第一

歸命彌勒世尊。

問曰:「何故如來說此修多羅?」

答曰:「捨等四句示現施、戒、修行相三種功德,是菩薩、外道、聲聞、辟支佛共法;深心等四句示現即彼四法唯菩薩行,不與外道、聲聞、辟支佛共,是故如來說此修多羅。布施示現施功德,遠離殺生等示現戒功德,慈悲等二句示現修行功德,此義云何?有外道凡夫,離善知識、不聞正法、不善思惟、不如說行故,妄執常見等能集業因,諸結使等相依有力增長世間因故,堅著妄執決定成就世間因故,離實諦見故無利益他心故,貪著世樂故。

「彼諸外道雖有施等善根種子,以疑悔故,愛水潤識,住五取陰 地,無明土覆時節和合能生識牙,次第增長成世間果。又聲聞、辟 支佛人親近善知識,從已度生死海、欲度生死海人,聞說世間過 患、復自少見,厭世間苦、樂涅槃樂,欲捨世間、追求出道,雖不 取施等功德而亦不離施等功德,能伏煩惱得上勝法。以是義故,雖 復修集施等善法,以無四法故,不得大菩提。

「又,菩薩人畢竟具足成就八法,建立大事、荷負重擔,親近真善知識,深見世間過患、知涅槃寂靜,為眾生故不厭世間苦,初發菩提心不失因故,深心成就;捨自身樂為利益眾生故,修行施等功德迴向大菩提,依方便力增長微少施等功德,能護自身不墮聲聞辟支佛地;以究竟成就般若波羅蜜故,能清淨施等功德,令住菩薩道,示現深心等四句,能攝取施等四句,為菩薩不同法,能得一切種智,是故如來說此修多羅。」

問曰:「復以何義,如來說此修多羅?」

答曰:「為遮無因、顛倒因,隨順正因果,是故如來說此修多羅。 此義云何?言不退阿耨多羅三藐三菩提者,以深心成就故,此明何 義?以諸菩薩摩訶薩見法界時即得永離菩提心障,謂身見等一切煩惱,出過聲聞、辟支佛地入菩薩位,起於初地,菩提之心不失因故,證得深心,是故名為不退阿耨多羅三藐三菩提。

「又言不轉者,以證勝法故。此明何義?以成就施行故。此復何義?以起無損害心根本業道,攝取上上勝行,是故不轉離根本業道修行施等行一切處不退,以是義故名為不轉。

「又言行菩薩行時降伏一切諸魔怨敵者,以善知迴向方便心成就故。此明何義?略說四魔,謂煩惱魔、陰魔、死魔及以天魔,唯煩惱魔以為根本,依煩惱魔有餘三魔。何以故?以諸凡夫煩惱纏心,依此煩惱所纏之心,樂於世間求彼處樂,布施等法迴向天道。以此義故,為彼陰魔、死魔所纏繫屬天魔。是故菩薩斷身見等一切煩惱,復能遠離不活等畏,捨自身樂,為欲利益諸眾生故,修集慈悲布施等行善根功德,皆悉迴向薩婆若智,遠離一切諸魔惡道,是故名為行菩薩行時降伏一切諸魔怨敵。

「又言於諸世間心不疲惓者,以大慈大悲心成就故。此明何義?以 諸菩薩摩訶薩,常為世間一切眾生愚箭所射心受苦惱,以大慈大悲 心成就故,見眾生利即是己利,是故大慈大悲心生,則能利益一切 眾生,是故名為於諸世間心不疲惓。

「又言如實知一切法自體相者,以方便成就故。此明何義?以知諸 法自相同相故。此復何義?以諸菩薩善知世諦、善知第一義諦方 便,是故不著有無二邊。此明何義?菩薩雖見識境界事,而先已觀 察識境界事。何以故?以常不捨第一義諦深心力故,是故不墮著有 邊見,雖常不捨第一義諦、而常善知世諦之事。何以故?以常明見 諸有為行不捨世間心念言說故,是故不墮著無邊見。以能善知此二 種義,是故名為如實知一切法自體相。 「又言以心不疲倦故,不依他智,速疾成就阿耨多羅三藐三菩提者,以般若波羅蜜成就故。此明何義?以諸菩薩摩訶薩般若觀察有為法故。此復何義?菩薩觀察諸有為行,無人無眾生無主無自在,迭共相因增長有力,依於本業造一切業,猶如幻師所作幻人,往來跳躑種種技術無疲惓者,是故名為以心不疲惓故。又心不疲惓者,以離眾生相故。此明何義?有為諸行一切無實,唯有種種諸業使行他力相依故,能成就有為諸行。是故菩薩知有為法實無神我,而不依他智,隨所修行,皆以毘離耶波羅蜜增長成辦,速疾成就阿耨多羅三藐三菩提。以諸菩薩摩訶薩求薩婆若,示現遠離無因、顛倒因,隨順正因果,是故如來說此修多羅。」

問曰:「復以何義如來說此修多羅?」

答曰:「依不定聚菩薩求定聚故,成就何等行得入正定聚,示現彼菩薩入正定聚修正因行,是故如來說此修多羅。此義云何?菩薩未證初地正位,雖無量劫修集善根,而未能得不退轉位、未得畢竟無怖畏處,心未安隱,常為世間苦惱所逼。未得菩提心根本慈悲心力,未得增上力故,以世間道智觀察十二因緣,如實觀有為行,以依世間道觀寂靜法界,求大涅槃無方便智故,墮聲聞、辟支佛地。若墮聲聞、辟支佛地有三種失。何等為三?一者、退失一切大乘善根種子;二者、退失能與一切眾生樂因;三者、退失薩婆若智。以是義故,如來經中說言:『迦葉!譬如一切世間天人,雖復修治偽琉璃珠,而彼偽珠終不能作真琉璃寶。如是,迦葉!一切聲聞修戒定慧,及頭陀等一切功德,終不能得坐於道場成阿耨多羅三藐三菩提。迦葉!譬如修治大毘琉璃,隨意能得無量百千萬億珍寶。如是,迦葉!修菩薩行故能出生一切聲聞辟支佛等及以人天。』依此義故,如來《寶積經》中說,菩薩有四種非善知識。何等為四?一者、求聲聞人但欲自度;二者、求緣覺人喜樂小事;三者、讀外經

典路伽耶等;四者、習學一切文辭嚴飾。所有親近此四種者,但增 世利不增法利。

「復有經中,大德迦葉白文殊師利:『有五逆人能發阿耨多羅三藐 三菩提心,修諸功德證大菩提,而羅漢不能。譬如根敗之人於五欲 境界無所能為、無所增益,如是聲聞、辟支佛人離諸結使,於一切 佛法無所能為、無所增益,無如是觀察佛法力。是故,文殊師利! 一切凡夫報如來恩,非聲聞也。何以故?凡夫之人聞佛功德,為不 斷絕三寶種故,能發阿耨多羅三藐三菩提心;聲聞之人雖復終身聞 諸佛法十力四無畏等,而不能發阿耨多羅三藐三菩提心。』

「又《般若波羅蜜經》中說:『諸天子!未發阿耨多羅三藐三菩提心者,彼人應發大菩提心。已入聲聞辟支佛位,不能復發阿耨多羅三藐三菩提心。何以故?一切聲聞、辟支佛等斷生死流,不能數數受生世間。發阿耨多羅三藐三菩提心諸菩薩摩訶薩,於初地中見實諦故,發阿耨多羅三藐三菩提心,不失因故攝得深心。以般若波羅蜜如實攝取修戒行等,不著身命唯為利益眾生,修行彼時名為不退轉菩薩。』

「應知!是故如來十地修多羅中說:『菩薩生如是心,即時過凡夫 地入菩薩位,生在佛家種姓尊貴,無可譏嫌過一切世間道,善住菩 薩法中,善住菩薩正處,入三世平等真如法中。如來種中畢定究竟 阿耨多羅三藐三菩提。菩薩住如是法,名住菩薩歡喜地。』

「以不動法故過五怖畏,所謂:不活畏、惡名畏、死畏、墮惡道 畏、大眾威德畏,彼皆遠離。何以故?是諸菩薩離我等相故。過凡 夫地者,彼過有九種。應知!入菩薩位者,位過,初成出世間心, 如始住胎相似法故。生在佛家者,家過,以依方便般若生家,生相 似法故。種姓尊貴無可譏嫌者,種姓過,以大乘行生,子相似法 故。過一切世間道者,出過,以世間道不能攝取出道,生相似法 故。入出世間道者,入過,以出世間道攝取入道,生相似法故。善住菩薩法中者,身過,以大悲為體,於作他事即是己事,自身體相似法故。善住菩薩正處者,處過,不捨世間、方便不染、善巧正住,生住處相似法故。入三世平等真如法中者,業過,順空聖智,生命相似法故,如來種中決定究竟阿耨多羅三藐三菩提者,畢竟過,佛種不斷究竟涅槃,道成就相似法故。如是示現凡夫生、菩薩生,入胎不相似,以有染無染故,如是次第家不相似、種姓不相似、出不相似、入不相似、身不相似、處不相似、生業不相似、成就不相似。如是尊者婆藪槃豆說畢竟成就心。有餘論師更異法釋。偈言:

「『菩薩摩訶薩, 以生何等心, 見世間虛妄? 佛說彼初心。』

「此明何義?見世間虛妄者,以一切世間唯因緣生無有實體。如尊 者龍樹菩薩偈言:

「『因緣和合生, 彼法無實體, 若無實體者, 云何名有法?』

「聖者無盡意菩薩摩訶薩無盡經中說:『觀察因緣方便智,知一切 法依因依緣和合而生。若一切法依因依緣依和合生,彼法不依我、 人、眾生、壽命。若法非我、非人、壽命,彼法不可數為過去、現 在、未來。菩薩若能如是觀察,是名菩薩摩訶薩觀察因緣和合方便 智。』不依我者,此義云何?以依種種因緣法生,不依我生,以無 實我體故。如眾緣生火,火體有熱,熱無實體,而因緣和合名火有 熱。如是不離身根知外更有實我,以無實體故。無實體者,為同虛 空?為同有為?若同虛空,即是無物;若同有為,即是無常。我、 人、眾生、壽命等者,為可化眾生種種名說非有實我。 「又如經中,大海慧菩薩為聖者大悲思梵說成就一切佛法問答品中,偈言:

「『諸法因緣生, 彼法無實體, 法若實無體, 彼法實不生, 菩薩知眾生, 如是無實際, 依彼實際智, 知諸法虛實。』

「以是義故,菩薩知一切法因緣和合而生,眾生無其實體。若如是者,一切世間心識皆是虛妄分別,彼菩薩心於一切法實際平等無礙智行即是初心,是故名為初發阿耨多羅三藐三菩提心。是故偈言:

「彼不見凡地, 以彼體空故, 是故諸佛說, 過彼凡夫地, 遠離聖人法, 染著身見等, 住五欲資生, 故名凡夫人。」

「此明何義?地者,彼處生凡人,是名凡夫地。此是三界中煩惱所 縛處,依止煩惱生,是名凡夫地。是故,彼初心見三界皆空,不起 一法相,以其不起一法相故,則不願樂一切處生。除慈悲心為欲教 化諸眾生故,而常觀察寂靜法體。以是義故,說彼菩薩過凡夫地。 是故偈言:

「法體無故空, 空故無所作, 離一切相故, 智者無所求。」

「入菩薩位者,偈言:

「即空名菩提, 佛說煩惱病, 墮辟支佛地, 及取聲聞位。」

「即空名菩提者,如實覺知眾生虛空名為菩提。是故,聖者無盡意菩薩四念處說,諸菩薩摩訶薩修法觀時,若見一切法離空無相無

願、無行無生無起,及離十二因緣者,不名如實覺。若不見少法離空,無相、無願、無行、無生、無起,及離十二因緣。菩薩若能如是覺知一切眾生無其實體,是名如實覺。是故,偈言即空名菩提。故若初地菩薩覺知一切諸眾生空,棄捨利益一切眾生,而取聲聞、辟支佛位,是則名為初地菩薩所治煩惱。是故,偈言佛說煩惱病,墮辟支佛地,及取聲聞位故。

「又復偈言:

「知空離二邊, 無二染涅槃, 以無涅槃染, 佛說菩薩位。」

「知空離二邊者,此義云何?如《如來法印經》中說:『舍利弗言:「無差別法者,即名為空。」舍利弗言:「世尊!所言空者,此言何謂?」佛告舍利弗:「所言空者,非可說、非不可說。若非可說、非不可說,彼不可表。若不可表,彼非世間、非出世間。以非世間、非出世間故,說名為空。若能如是了知空者,名離二邊。菩薩若離彼二邊者,不墮煩惱,不取聲聞、辟支佛等二種涅槃。」』

「佛說煩惱病者,取異地相故。取異地相者,謂取聲聞、辟支佛等 異地相故。亦名棄捨利益眾生,以取無為涅槃樂故,又以妨於佛菩 提故,復有異義:無煩惱病者,離煩惱病故,以其不取二乘涅槃, 依本願力不捨利益諸眾生故。若如是者,無二乘病無煩惱病,如實 修行一切法空,是名諸菩薩摩訶薩入菩薩位。以能遠離一切煩惱、 遠離一切對治法故,如是菩薩以無二行依本願力不捨利益諸眾生 故,不墮聲聞、辟支佛地,不為世間煩惱所染。此是菩薩摩訶薩等 最難勝事,以雖不見一切眾生而為眾生修行諸行,如是之事不可思 議,一切世間不能覺知,第一希有,一切聲聞辟支佛等所不能見。

「以此義故,龍樹菩薩摩訶薩《集菩提功德論》中說偈言:

「『此最希有事, 第一不思議, 菩薩為行行, 而不見眾生。』

「如來亦說為欲讚歎諸菩薩摩訶薩如實希有功德。如經中說,菩薩摩訶薩有四種真實功德。何等為四?一者、能信解空亦信因果;二者、知一切法無有吾我,而於眾生起大悲心;三者、深樂涅槃而遊生死;四者、所作施行皆為眾生不求果報若如是者,即生在佛家。是故偈言:

「菩薩摩訶薩, 以離諸煩惱, 則證菩薩位, 是故生佛家。」

「此明何義?又佛家者,行何等法生如來家?調離煩惱故、解空行故、知自位故;又作利益眾生行故、不迷失行故,得如是法名為菩薩摩訶薩生在佛家。」

「此明何義?偈言:

「佛說如來家, 謂方便般若, 菩薩生是家, 是故不可嫌。」

「此義云何?言方便者,略說不捨一切眾生;言般若者,所謂不取一切諸法。此二種法是諸佛家,是故菩薩摩訶薩依方便、般若生,以為方便、般若二法之所攝故。菩薩摩訶薩為欲利益一切眾生生在世間,而實不依煩惱業生。若如是者,菩薩摩訶薩不可譏嫌,一切天等可呵之法皆悉遠離,生佛勝家。以是義故,種姓尊貴不可譏嫌。是故,如來修多羅中為婆羅門而說偈言:

「『天人乾闥婆, 龍夜叉眾鳥, 如是等諸業, 皆悉已滅盡。 彼漏散滅盡, 如蓮華不染, 若能如是知, 不染著諸欲。』 「如是菩薩摩訶薩是名真佛子,非天等異子。是故偈言:

「菩薩知實際, 及修波羅蜜, 以得無漏道, 故出過世間。」

「菩薩知實際者,此明何義?明一切法皆悉寂靜。是故如來而說偈言:

「『一切法無體, 以實無諸事, 不生不滅故, 得名為實際。』

「如是般若波羅蜜,知一切諸法無體真實際,以般若波羅蜜知斷道行,五波羅蜜知方便功德道。如是菩薩摩訶薩以此功德智慧能成佛菩提,能盡諸煩惱,能利益眾生。

「又修諸波羅蜜亦知如實際。云何知?不見施者、受者、財物三種 法故,修行清淨諸波羅蜜。菩薩如是修行實際,是故無漏,以無漏 故出過一切諸世間道。是故偈言:

「分別世間行, 煩惱稠林中, 取出世間位, 是入出世道。」

「分別世間行者,略有二種分別:一者、實分別,謂色是可見相,如是等;二者、勝分別,即彼色中青黃赤白等。世間者,即五陰煩惱;稠林者,深嶮黑闇恐怖可畏,不可觀察難見難知。

「如是菩薩摩訶薩觀察自體,分別、勝分別、五陰分別,如向所說事中不著,作是思惟:『我當云何令眾生解?』是故偈言:

「如實知諸法, 實勝陰一二, 不見眾生事, 云何化眾生? 菩薩摩訶薩, 修行無漏智, 及以功德行, 趣於出世道。」 「是故菩薩入出世間道。」

問曰:「云何善住菩薩法中?」

答曰:「偈言:

「入菩薩諸地, 安住己法中, 依通及自在, 化一切眾生。」

「入菩薩諸地者,如下經言:『善知地地轉行故。』化一切眾生者,如下經言:『得百三昧乃至無量百千萬億那由他劫不可數知故。』得自在者,如說種種功德,何等時?何等法?何等自在?何等成就事?何等行?得諸自在不退一切佛法種子義,成就一切佛法,故言善住菩薩法中。」

問曰:「云何善住菩薩正處?」

答曰:「偈言:

「一時諸佛邊, 聞持思修說, 行解義成就, 正覺供養等, 菩薩摩訶薩, 修行如是法, 是名為安住, 菩薩正處中。」

「是故,經言善住菩薩正處。」

問曰:「云何入三世平等真如法中?」

答曰:「偈言:

「知諸佛菩提, 及佛菩薩行, 知佛三世空, 是名善意入。」 「此義云何?謂知一切三世諸佛法身平等。又復能知一切諸佛依色 身故,修行一切佛菩薩行,及知一切過去未來現在諸法,皆從因緣 和合而生無其實體。善意入者,如向所說三世諸法平等無二,如實 而知一味等味不破壞入。是故經言:『入三世平等真如法中。』」

問曰:「云何如來種中畢定究竟阿耨多羅三藐三菩提?」

答曰:「偈言:

「菩薩淨煩惱, 及淨眾生心, 具足大慈悲, 畢定成菩提。」

「菩薩淨煩惱者,此義云何?以初地所治身見等煩惱,於見道時中皆悉遠離故,彼見道中遠離煩惱。如向所說,見一切法三世平等,如實中說。及淨眾生心者,如下經言:『於一念頃教化百眾生,乃至若以願力自在勝上。』如是等依教化力清淨諸煩惱故得。故下經言:『是故我當先住善法,亦令他人住於善法。何以故?若人自不行善、不具善行,為他說法令住善法,無有是處。』以得大慈大悲心故,是故上經言:『是心以大悲為首,是故菩薩自淨煩惱淨眾生心具大慈悲,名為畢竟得阿耨多羅三藐三菩提。』以畢定進趣大菩提故,偈言:

「佛子金剛藏, 說十法初心, 即名佛菩提, 畢成佛道故。」

「此義云何?以聖者金剛藏菩薩摩訶薩說此十種法為菩薩初地無漏菩提心,即此十種心名為佛菩提,故言畢竟阿耨多羅三藐三菩提。 又偈言:

「譬如好種子, 能生莖葉等, 如是菩提心, 不異諸佛法。」 「此義云何?以初證法心於一切佛法以為種子,以初地法與一切佛 法以為因故。又偈言:

「初地心增長, 佛說為諸地, 最妙勝菩薩, 說初月為喻。」

「此明何義?如《文殊師利問菩提經》中說偈言:

「『譬如月初生, 增長即滿月, 如是歡喜地, 增長即是佛。』

「如是十句義,餘論師異釋應知。是故如來為不定聚菩薩求定聚 故,說此修多羅。」◎

彌勒菩薩所問經論卷第一

後魏天竺三藏菩提流支譯

◎問曰:「以何義故名不退轉?」

答曰:「以諸菩薩證得初地畢定因故,乃至未得成佛以來,常以深心如實修行,次第增長菩提之心。彼所治法不能障故,名不退轉。」

問曰:「復以何義,名不退轉阿耨多羅三藐三菩提?」

答曰:「以得成就不退轉因,謂深心等八種法故。又不退轉心相違之法,身見貪等一切煩惱,以見道力悉遠離故。又身見等一切煩惱,無始世來隨無智生,不能遠離;取我樂等因,離方便般若,為諸世間苦惱所逼,棄捨利益一切眾生取於涅槃。是故菩薩得慈悲深心,遠離取著我樂等因,有方便般若,雖為世間苦惱所逼,而不放捨利益眾生所作之事,斷身見等煩惱根本,彼時得不退轉阿耨多羅三藐三菩提。是故聖者無盡意說言:『彼心離一切煩惱生。』如是等。」

問曰:「若離身見等煩惱名不退轉因者,菩薩及須陀洹俱離身見等煩惱。何故菩薩不退轉阿耨多羅三藐三菩提,而須陀洹等退轉?」

答曰:「以心行差別故。此明何義?菩薩、聲聞發心以來,心行等相一切差別故。云何差別?聲聞之人不能修學利益他因,是故棄捨利益眾生自求涅槃,見三界中貪等煩惱火之所燒無常所逼,厭離三界如身衣火燃,觀無常等五陰有為行,乃至離三界結,然後除貪等煩惱,漸漸微薄出過三界。菩薩之人得深心故,常樂利益一切世間,為諸眾生作利益行。雖為世間苦惱所逼,以成就方便智慧力故,雖能如實修行聲聞道,而不讚聲聞道。以先斷所障取聲聞位法

故。何者是取聲聞位法?謂捨大悲心,不能增長大悲等行。若諸菩薩得深心等修行菩提心眷屬等法,能作證菩提位因。彼時菩薩見一切法故,能增長菩提心力,方便推求利益一切眾生之事。彼時即見如實法界,見法界故即時遠離見道所治一切煩惱,即得畢竟大菩提心。

「如《十地經》說:『菩薩摩訶薩生如是心,是心以大悲為首。』 如是等。彼菩薩如是證見道已,方便推求利益一切諸眾生,因善學 大悲深心等法,離我樂等不為煩惱火之所燒,因不相似故,菩薩摩 訶薩常以深心為利益他而修行故,即見道時斷三界中一切煩惱,而 聲聞等先不修集慈悲方便,是故無有利益他行,漸斷煩惱後得羅 漢。

「以是義故,《大海慧菩薩經》中說:『菩薩先已修集善根,相應 煩惱。所謂大悲波羅蜜等,此諸善法名為煩惱,非餘煩惱。依彼煩 惱為化眾生住於世間,以其所求未究竟故。』以是義故,雖復俱離 彼身見等一切煩惱,而菩薩不退轉阿耨多羅三藐三菩提,聲聞退 轉。

「如阿耨大池聖者龍王經中,佛告龍王:『菩薩摩訶薩所證之位, 是出世間法,而不離世間。龍王!有方便般若聖智三昧,是名菩薩 摩訶薩出世間位。龍王!譬如聲聞入聲聞位,名須陀洹,不墮惡 道。龍王!菩薩亦爾,入菩薩位,名為不退轉菩薩,不墮惡道。

「『龍王!聲聞之人,不斷煩惱取聲聞位,以其未過不自在法得初 果故。龍王!菩薩摩訶薩過聲聞位證菩薩位,是故不取聲聞小果, 乃取道場大菩提果。以是義故,聲聞有量,菩薩無量。

「『龍王!如有二人俱墮高山,其一人者,勇健多力,先已習學種種技能,以方便智還上山頂;其第二人身力微少,先不習學種種技

能,無方便智,墮彼山下不能還上。龍王!如是菩薩摩訶薩觀察一切法空無相無願無為,依般若力觀察眾生,住於一切種智山頂。』

「復有經說,大德須菩提!菩薩摩訶薩斷身見等無量煩惱,而不取 彼聲聞小果,乃取諸佛大菩提果,觀察一切佛法,以大慈悲心憐愍 一切眾生,修菩薩行,斷身見等一切煩惱。是故不取聲聞小果,乃 取諸佛大菩提果。須菩提白文殊師利言:『文殊師利!此事希有, 此大方便菩薩之人,斷身見等一切煩惱,而能不取聲聞小果。』文 殊師利言:『大德須菩提!菩薩摩訶薩有大方便所攝智性,是故菩 薩雖如實知彼身見等一切煩惱,而能不取聲聞小果。大德須菩提! 如大力士持薄利刀斬斷娑羅樹,彼娑羅樹即住不倒。大德須菩提! 菩薩摩訶薩亦復如是,有大方便般若智性,是故菩薩斷身見等一切 煩惱,而能不取聲聞小果。

「『大德須菩提!彼娑羅樹復於異時值天雨潤,即便還生枝葉華果,具足如本眾生受用。大德須菩提!菩薩摩訶薩亦復如是,得大慈悲心雨所潤,雖斷身見等諸煩惱,還入三界方便示現生世間家,隨順一切眾生受用。

「『大德須菩提!復於後時彼娑羅樹大風吹動,即便倒地更不復生。大德須菩提!菩薩摩訶薩亦復如是,為大智慧猛風所吹,在道場地永滅不生。』

「是故菩薩摩訶薩發心已來,一切心行不同聲聞、辟支佛等,以諸菩薩摩訶薩心行等法本來不同故;若一切同者,應聲聞作菩薩,菩薩作聲聞。」

問曰:「如聲聞人先斷見道煩惱,然後漸斷修道煩惱,菩薩何故不同聲聞,先斷見道煩惱,然後乃斷修道煩惱?」又問:「如菩薩取

無量世住,修集無量善根,須陀洹等何故不取無量世住,亦不修集無量善根?」

答曰:「須陀洹等常有樂斷煩惱心故,以得無漏對治明故,轉轉怖 畏諸世間故,生如是心:『何時當得離一切苦入無餘涅槃?』故修 道中餘殘煩惱自然漸盡。以是義故,聲聞不取無量世住,亦不修集 無量善根。菩薩之人無量世來,為諸眾生作利益因,為諸眾生作利 益事,得如是等畢竟之心。復見真如甘露法界,觀察一切諸眾生 身,而實不異我所求處,是故菩薩見修道中一切煩惱能障利益眾生 行故,即見道中一時俱斷。又以觀察利益一切諸眾生樂勝涅槃樂, 是故菩薩取無量世住於世間修一切行,謂薩婆若智故能明見,修集 無量菩提善根,得大菩提利,是故修集無量善根。」

問曰:「菩薩若見修道煩惱能障利益諸眾生行,以是義故,於見道中即斷除者,以何義故,即見道中不以世間智伏修道煩惱?」

答曰:「遠離一切煩惱名不退轉因,若離無漏道見法,離無漏道斷一切煩惱者,可如是難,何故世間道不伏修道煩惱?若世間道同世間道,無如是力,是故不得言不退轉;而此菩薩即見道時永斷一切所治之法,得大悲等生畢竟菩提心,名不退轉菩薩。應知!是故菩薩如實見法成就方便,不取聲聞、辟支佛地,如實知見一切世間種種過患,為欲利益一切眾生行世間行,不捨世間,不為世間過患所染。

「是故聖者文殊師利告天子言:『諸天子!菩薩摩訶薩不住有為不住無為,是故菩薩名為福田。何以故?菩薩離有為法、不住無為法,知有為有過、知無為無過。知一切過故,不住有為;知無為法,不住無為。諸天子!如大力士仰射虛空,而彼射箭於虛空中無所依住,而不墮地。諸天子!此事為難,更有難者。』天子白文殊師利言:『如是之事希有最難,更無難者。』文殊師利告天子言:

『菩薩摩訶薩所作難事復過於此,以菩薩摩訶薩不捨有為而證無 為,不墮有為而能教化墮有為者。』」

問曰:「畢竟定者,如來經說:『若畢竟定聲聞之人,遠離三結得須陀洹不墮惡道,人天七反永離諸苦,畢竟證得阿羅漢道。』菩薩亦爾斷三結等,以何義故,不同聲聞而無量世住?」

答曰:「此義不然。何以故?言畢竟定者,依聲聞乘修多羅說,菩薩摩訶薩依無量行、依求一切種智,清淨出世間道能淨薩婆若。大乘修多羅中說:『以是義故,菩薩攝取無量世住。』」

問曰:「此義不然。何以故?若初地菩薩摩訶薩遠離一切對治之 法,得畢竟不退轉阿耨多羅三藐三菩提者,以何義故,文殊師利問 菩提經中說:『初發心能過聲聞地,第二行發心能過辟支佛地,第 三不退發心過不定地,第四一生補處發心安住定地。』」

答曰:「彼經中依證勝進地、依遠中遠離所治法、依上上地說過不定地,是故此說不違彼經。此義云何?如初禪對治法。此明何義?如小乘人未來禪中斷不定因欲界修道煩惱,乃至第四禪中亦說斷修道煩惱,以遠中遠勝對治法而不相違。何以故?以對治因等故。菩薩摩訶薩亦復如是,於初地中斷菩提心相違退因,謂身見等一切煩惱,以得成就深心等修行,畢竟遠離退菩提心因故,乃至八地中得勝進遠中遠勝對治法,名為過不定地安住定地。以對治法等故、以定因故,言過不定地,義不相違。」

「又言過不定地者,求佛菩提大涅槃心未斷絕故,所起諸行功用疲倦名不定因,是故八地以上始言過不定地。此義云何?如彼處過苦等。此明何義?如小乘中厭過欲界苦,雖厭過欲界苦,而初禪地未過識等苦因,以未過所治法,是故如來經中說第二禪中過苦。如經中說:『憂根何處滅?』佛言:『初禪中滅。』又問:『苦根何處

滅?』佛言:『二禪中滅。』又問:『喜根何處滅?』佛言:『三禪中滅。』又問:『樂根何處滅?』佛言:『四禪中滅。』如是過一切色相等厭,初禪時即過一切色等諸相,而第四禪中厭過因故,說第四禪過。菩薩摩訶薩亦復如是,於初地中已過不定地,二地已上乃至七地以來,求佛菩提大涅槃心未斷絕故,所起因行疲倦功用名不定地,是故為彼未滿足心不定因故,八地中說過不定地,言不相違。

「又得畢竟菩提心因緣具足和合故,言初發心過聲聞地。如《法印 經》中如來說言:『彌勒!發菩提心有七種因。何等為七?一者、 諸佛教化發菩提心;二者、見法欲滅發菩提心;三者、於諸眾生起 大慈悲發菩提心;四者、菩薩教化發菩提心;五者、因布施故發菩 提心;六者、學他發菩提心;七者、聞說如來三十二相八十種好發 菩提心。彌勒!諸佛教化發菩提心、見法欲滅發菩提心、於諸眾生 起大慈悲發菩提心,此三發心能護正法、速疾成就阿耨多羅三藐三 菩提,餘四發心非真菩薩,不能護持諸佛正法、速疾成就阿耨多羅 三藐三菩提。』此明何義?若菩薩成就深心畢竟不退,得大悲心大 勇猛力,為諸世間一切眾生過箭所射,而觀眾生起大慈悲,攝諸善 根聚集增長,故言初發心時過聲聞地。第二發心過辟支佛地者,辟 支佛人、勝聲聞人畢竟不為他身,畢竟自為身求寂滅涅槃。若菩薩 初觀察法性上上觀無生法忍時,未得過不定道,所有生心皆悉能 過、聲聞辟支佛地故,言第二發心過辟支佛地。第三發心過不定地 者,於初地中離不定因得定因故,所有生心過不定地故,言第三發 心過不定地。第四發心安住定地者,二地已上遠離一切所治之法, 是故安住畢竟定地故,言第四發心安住定地。

「又不退轉阿耨多羅三藐三菩提者,所謂菩薩得離發菩提心相違法時,名不退轉菩薩。如《寶女經》中說:『寶女!菩薩摩訶薩有三十二罣礙塹路發菩提心相違之法。何等三十二?一者、求聲聞乘;

二者、求辟支佛乘;三者、求釋梵處;四者、倚著所生淨修梵行; 五者、專一德本言是我所;六者、若得財寶慳貪愛悋;七者、以偏 黨心而施眾生;八者、輕易戒禁;九者、不念道心專精之行;十 者、瞋恚之事以為名聞;十一者、其心放逸;十二者、馳騁;十三 者、不求博聞;十四者、不察所造;十五者、貢高自大;十六者、 不能清淨身口心行;十七者、不護正法;十八者、背捨師恩;十九 者、不棄捨恩;二十者、離堅要法;二十一者、習諸惡友;二十二 者、隨諸陰種;二十三者、不勤助道;二十四者、念不善本;二十 五者、所發道意無權方便;二十六者、不以慇懃咨嗟三寶;二十七 者、憎諸菩薩;二十八者、所未聞法聞之誹謗;二十九者、不覺 事;三十者、習持俗典;三十一者、不肯勸化眾生類;三十二者、 厭於生死。』

「又復所以不退不轉,以諸菩薩畢竟受持不退轉法故。如《娑伽羅龍王經》中說:『龍王!菩薩摩訶薩畢竟成就八種法故,得名為入不退不轉菩薩之數。何等為八?所謂如說修行:一者、觀察自過不觀他過;二者、乃至不為自身命故施惡於人;三者、若得利養其心不高,若失利養心亦不下;四者、於諸眾生起福田想,不生惡心;五者、所有財物悉與一切眾生共之;六者、於諸法中不欲獨解令他不知;七者、見他得樂生歡喜心,不由自樂生歡喜心;八者、於愛不愛其心平等。菩薩具此八種法故,不退不轉阿耨多羅三藐三菩提。』」

問曰:「應說不轉相,云何不轉相?」

答曰:「我正欲說,而汝復問。菩薩成就不轉相者,如來處處修多羅中廣說,應知。如《智印三昧修多羅》中說言:『彌勒!有五種法名為菩薩畢竟不轉阿耨多羅三藐三菩提相。何等為五?一者、於諸眾生起平等心;二者、於他利養不生嫉心;三者、乃至自為身命,不說法師比丘諸惡過失;四者、終不貪著供養恭敬讚歎等事;

五者、畢竟得甚深法智忍。彌勒!更有五法故,得名為不轉菩薩。 何等為五?一者、不見自身;二者、不見他身;三者、心不分別妄 說法界;四者、不見菩提;五者、不以相見如來。』如是等。

「又《般若波羅蜜經》中廣說不轉之相,如彼經說應知。」

問曰:「云何得異法菩提心?不退轉菩提心因,於異佛菩提名不退轉阿耨多羅三藐三菩提心。」

答曰:「以得決定因故。此明何義?以初地菩薩成就畢竟因,以依此因畢竟證大菩提,是故言得不退轉阿耨多羅三藐三菩提。言阿耨多羅者,謂勝一切有為法故;言三藐三菩提者,謂離一切諸不善法煩惱習氣故,於一切處無障礙故,一切種一切法如實正知故。是故言三藐三菩提。」

問曰:「應說不退不轉功德,云何不退不轉功德?」

答曰:「不退不轉功德者,如來處處經中廣說,應知。如《十地經》說:『諸佛子!若有眾生厚集善根故、善集諸善行故、善集諸 功德行故,善供養諸佛故、善集清白法故、善知識善護故、善清淨 心故、入深廣心故、畢竟信樂大法故、現大慈悲故,如是眾生乃能 發阿耨多羅三藐三菩提心。』

「厚集善根者,菩薩從初發心已來能過聲聞、辟支佛性,是故能與 不退不轉菩薩之位以為種子,貪等善根非正種子。久修無量諸功德 行故,言厚集善根故。

「善集諸善行者,菩薩正修諸行,名修諸善行,行修生起名異義一。又言行者,清淨身口意業正命自活,以諸菩薩離損害心,為起成就利益一切諸眾生行,一切聲聞、辟支佛等不能得度智慧大海,而菩薩能渡故,言善集諸善行故。

「善集諸功德者,以布施忍辱不放逸等,四攝四家化眾生因,諸法 種子增長正集故,言善集諸功德故。

「善供養諸佛者,為增長他利益因力即是己事,正快無量種種供養、種種恭敬、聞正法等,生生供養恭敬諸佛故,言善供養諸佛故。

「善集清白法者,以諸菩薩無量門集布施等行修諸白法,為取大菩提成就一味心正迴向故,能成就不退轉法故,言善集清白法故。

「善知識善護者,唯佛如來為善知識,能護菩薩令發心增長,安住 不退不轉法中故,言善知識善護故。

「善清淨心者,以不求自樂、專一味心為他利益,長夜不為自愛等門煩惱所染故,言善清淨心故。

「入深廣心者,大乘法中專念廣勝畢竟因成就故,言入深廣心故。

「畢竟信樂大法者,以起大心不怯弱故,不畏世間一切諸苦,見求 小乘諸眾生等起大悲心,欲與一切眾生樂,故知一切種智處,以方 便力令眾生得故,言畢竟信樂大法故。

「現大慈悲者,以見生死種種諸苦逼惱眾生,無舍無洲無有救者, 為彼眾生滅諸苦惱,行捨大捨極難捨等,以方便力入大苦中故現慈 悲。又言慈者,初發心菩薩以少力故,但願憐愍一切眾生,是故名 慈。又言悲者,如是如是為於一切眾生修行,如是如是於勝法中起 上上心,是故名悲,故言現大慈悲故。

「又不退轉者,菩薩摩訶薩有八種法,能成不退轉地。何等為八? 一者、大悲;二者、心安住;三者、智慧;四者、方便;五者、不 放逸;六者、發精進;七者、善住念;八者、值善知識。初發心菩 薩應速修行此八種法如救頭然,後方修集菩薩其餘不退轉法,依此 八法修集其餘不退不轉一切功德。彼不退轉一切功德,處處經中廣說應知。」

問曰:「但說不退阿耨多羅三藐三菩提便足,何故復言不轉?以得不退者即是不轉故。」

答曰:「以得不退因畢竟成就深心,故名不退。言不轉者,依不退 深心,起餘心行上上勝進,故名不轉。」

問曰:「若爾,不退不轉更無異義,云何不轉於不退為勝?」

答曰:「言不退者,依不損害心根本業道,起利益他行,證上上勝義故;言不轉者,修行成故。又不退者,永斷一切得勝法障身見等煩惱根本盡故;言不轉者,於修道中斷滅根本無明故。又不退者,善集具足功德故;言不轉者,善集具足智慧故。又不退者,成就方便故;言不轉者,成就般若故。又不退者,過聲聞辟支佛地因故;言不轉者,善善集得菩提諸善根故。又不退者,成就大力故;言不轉者,成就修行故。又不退者,具足成就十力因故;言不轉者,成就四無畏因故。又不退者,依檀等白法為利益眾生故;言不轉者,檀等善根為眾生故迴向大菩提,常樂利益諸眾生故。又不退者,以得初地不失菩提心因,深心等成就故;言不轉者,二地已上起心十善業道所攝,異十善業道修行檀等數數增長故。」

問曰:「勝進法者,其義云何?」

答曰:「以諸菩薩心行增長,於先所得白淨法中上上勝進。以是義故,名勝進法。

「降伏一切諸魔怨敵者,以降伏魔、降伏怨、降伏敵對,是故說言降伏一切諸魔怨敵。此義云何?菩薩降伏煩惱魔故,天魔伺求不得少過,故言降伏一切諸魔;以得聞思修慧力故,利益眾生相違怨等

所不能障,故言降伏一切諸怨;一切外道諸論師等不能折伏,故言降伏一切敵對。是故說言降伏一切諸魔怨敵。又以般若力故,斷煩惱魔,故言降伏一切諸魔;以方便力故能修集菩提善根,過二乘所證涅槃怨敵,是故說言降伏一切諸魔怨敵。又復成就深心等法,過魔道因,故言降伏一切諸魔;求一切智地心未斷絕,伏所敵對疲倦等法,求一切智地心已斷絕,斷所敵對疲倦等法,故言降伏一切敵對。又得菩薩十種自在故,能降伏陰等四魔,故言降伏一切諸魔;以住正定聚過菩薩怨敵聲聞辟支佛地,是故名為降伏怨敵。又能善知諸魔業事,故言降伏一切諸魔;得諸菩薩善爭諸業,能過一切諸惡道因,故言降伏一切怨敵。又能善護所治等法諸魔怨敵,是故名為降伏一切諸魔怨敵。

「如經中佛說:『龍王!菩薩摩訶薩成就八法故,能降伏諸魔怨敵。何等為八?所謂一者、知五陰法如幻化故;二者、離身見等一切煩惱,如實知空故;三者、如實知一切有為行,不生而生諸世間故;四者、常教化眾生,常不捨離菩提心故;五者、心常堅固修行精進,而常怖畏三界故;六者、入不應入者,而常求上智為眾生故;七者、常修集功德,而信無常相故;八者、常修集智慧功德,而不求聲聞辟支佛智故。』」

問曰:「應說菩薩行,云何菩薩行?」

答曰:「菩薩行者,菩薩深見世間過患涅槃利益,發起智慧方便所攝大慈悲心,常為利益眾生修行,是故名為行菩薩行。

「如實知一切法自體相者,知一切法如彼法相如實知故。又自體相 名為相,如彼一切法自體相相,如是如實知。」

問曰:「應如是說知一切法相,不應說知一切法自體相?」

答曰:「為明可見、能見法不二故,是故說如實知一切法自體相。 此義云何?為明諸法自體相不離諸法更有相故。」

問曰:「若爾,應如是說知諸法體,不應說知相。」

答曰:「不然。若如是說,不離向所說過。此明何義?如諸法相離諸法更有體,恐如是取,為護彼過故二種說。此明何義?即自體相離體更無相,自體與相名異義一,是故說如實知一切法自體相,不如向難所說。」

問曰:「何故名為自體相?」

答曰:「若如實知一切諸法因緣,而有無實體相。此明何義?以諸菩薩隨順出世間智慧,能如實知彼諸法體。能如實知諸法體者,以見一切有為諸行依他因緣不常不斷。以是義故,不著斷常虛妄執著,有無不二成就中道。如實知見諸有為行虛妄不實,以得清淨心知有為行虛妄分別故,遠離破戒等垢因,清淨戒具足,乃至未成佛來修集善根,與一切眾生樂因,令得一切種智。」

彌勒菩薩所問經論卷第二

彌勒菩薩所問經論卷第三

後魏天竺三藏菩提流支譯

問曰:「云何於諸世間心不疲倦?」

答曰:「於見道時離身見等疲倦因故。此明何義?以諸凡夫取我相故,為生死等種種諸苦之所逼惱,於世間中生疲倦心。諸菩薩等見法體時,皆悉遠離著我相等,是故菩薩於諸世間心不疲倦。

「又復所以於諸世間心不疲倦,以得遠離五怖畏故。此明何義?以 世間眾生未離不活等五怖畏故,於諸世間生疲倦心。菩薩離不活等 五種怖畏,以離我相等故,具足修集功德智慧,是故菩薩於諸世間 心不疲倦。

「又得一味利他心故心不疲倦。此明何義?以諸菩薩依慈悲心起利他行,深心善修,猶如大海同一鹹味。菩薩亦爾,為利益他一味心故,以諸菩薩利益他行即是自利,為利眾生修集諸行,是故菩薩於諸世間心不疲倦。

「又以菩薩得安住心故,於諸世間心不疲倦。此明何義?以諸菩薩 乃至惡道,所謂活地獄、黑繩地獄、合地獄、叫喚地獄、多波那地 獄、波多波那地獄、阿鼻地獄、究究羅地獄、死屍地獄、刀林地 獄、劍林地獄、劈裂地獄、安浮陀地獄、阿波波地獄、阿吒吒地 獄、憂鉢羅地獄、拘勿頭地獄、香地獄、分陀利地獄、波頭摩地 獄,種種寒熱受諸苦惱,及泥犁中、畜生、餓鬼、修羅、人、天互 相殺害,共相食噉牽挽追求,或生或退,起於我慢嫉妬瞋恨,恩愛 別離、怨憎合會、老病死等憂悲苦惱,如是種種諸苦惱相,見聞愛 離利益眾生,其心一向不退不轉,畢竟安住大菩提心,是名菩薩於 諸世間心不疲倦。 「又不疲倦者,以願堅固故。此明何義?以諸菩薩依大慈悲等起利益眾生行,畢竟得深心根本諸行,善知堅固心故,隨順諸願作利益行,是故菩薩於諸世間心不疲倦。」

問曰:「何者名為菩薩摩訶薩堅固之願?」

答曰:「有五種法,名為菩薩堅固之願。何等為五?一者、聲聞乘不能動轉;二者、辟支佛乘不能動轉;三者、諸外道論不能動轉; 四者、一切諸魔不能動轉;五者、不以無因無緣自然動轉,是故菩薩於諸世間心不疲倦。

「復有五法,於諸世間心不疲倦。何等為五?一者、若見衰損利益,心無憂喜;二者、所作已辦如實知道故;三者、如實知道果故;四者、自身得寂靜故;五者、拔諸眾生苦惱心故,是故菩薩於諸世間心不疲惓。

「又不疲惓者,以得大慈大悲心故。此明何義?以諸菩薩得大悲心,見諸眾生沒溺生等極苦淤泥,無明所盲、貪愛所縛無所歸依,菩薩以得慈悲心力,智慧為首勤行精進拔眾生苦,為諸眾生於世間中受苦惱業,是故菩薩於諸世間心不疲惓。復有五法,知菩薩有大慈悲心。何等為五?一者、為與眾生安隱樂故,不惜一切資生之物;二者、不惜自身;三者、不護惜命;四者、修一切行不待多時;五者、怨親等悲,是故菩薩於諸世間心不疲惓。

「又不疲惓者,能忍一切諸苦惱故。此明何義?以諸菩薩得依緣力,其心勇猛過無數劫能受苦惱,以能忍受一切苦惱,是故菩薩於諸世間心不疲惓。有五種法,於諸世間能受苦惱。何等為五?一者、信諸法無我;二者、信諸法空;三者、觀世間法;四者、觀諸業報;五者、觀察諸業已盡,為諸眾生於無量劫而受苦惱。

「又不疲惓者,深心常求佛菩提故。此明何義?以諸菩薩常以深心 樂於涅槃、求佛菩提以堅固增長,為一切眾生種菩提因緣、善根種 子行世間行,是故菩薩於諸世間心不疲惓。復有五法,菩薩常求無 上菩提。何等為五?一者、不同餘乘智勝餘乘故;二者、世間最上 首故;三者、自度身故;四者、度他人故;五者、具足一切功德藏 故。

「又不疲惓者,以為教化諸眾生故。此明何義?菩薩長夜為諸世間 可化眾生隨順教化,為斷眾生世間苦惱,雖為種種苦箭所射,而於 世間心不疲惓。又教化眾生者,觀眾生心,隨諸眾生於五乘法應受 化者,而授與之。何等為五?一者、應正遍知乘;二者、辟支佛 乘;三者、聲聞乘;四者、天乘;五者、人乘。

「又不疲惓者,勇健無畏故。此明何義?以諸菩薩依大智慧力故、 依勇猛無畏力故,雖為世間苦箭所射,而於世間不生疲倦。有五種 法,得知菩薩勇猛無畏。何等為五?一者、衰損敗壞其心不憂;二 者、成就一切諸利益法其心不喜;三者、受諸苦惱其心不臧;四 者、得諸勝樂其心不欣;五者、瞋喜二相不可測知,是名菩薩勇健 無畏應知。

「又不疲惓者,不著身命故。此明何義?以世間人著身命故,常為生死苦箭所射,厭背世間生疲惓心。是故菩薩樂作利益諸眾生事,如實知身命故,棄而不著,為欲利益一切眾生,是故菩薩於諸世間心不疲惓。菩薩能知五種法故,不著自身。何等為五?一者、知身不從過去世來;二者、知身不向未來世去;三者、知身非堅固法;四者、知身無實神我;五者、知身無實我所,是故菩薩不著自身。菩薩能知五種法故,不貪著命。何等為五?一者、依智慧活不依邪命;二者、怖畏一切諸不善法;三者、觀無始世來未曾不死;四者、等共一切諸眾生有;五者、不可常保。

「又不疲惓者,不著自樂故。此明何義?以諸眾生著自身樂,受種種苦生疲惓心。菩薩捨自身樂、拔眾生苦,是故菩薩於諸世間心不疲惓。菩薩如實知五種法不求自樂。何等為五?一者、知樂如水泡;二者、知樂敗壞時苦;三者、得世間方便,以諸菩薩依善知識聽聞正法,繫念思惟以為根本,得身及眾生出世方便;四者、不依他智;五者、依自智力。

「又不疲惓者,現見一切諸白法故。此明何義?以諸菩薩依丈夫力得果報故,以諸白法依丈夫力故,無量劫事現見如夢,於未來世不依他力,依自丈夫力修集諸白法。作是思惟:『一切種智非他能與,依自力得。』是故菩薩知不依他,自發精進修集諸行,速得阿耨多羅三藐三菩提。如佛告阿難:『唯精進波羅蜜能得大菩提。』是故菩薩於諸世間心不疲惓。

「又不疲惓者,以證自然智故。此明何義?以諸菩薩過疲惓因,是 故成就不疲惓心,善知一切諸因緣法,依法生法次第增長猶如梯 橙,依般若根本成就精進,是故速證阿耨多羅三藐三菩提。

「又不退不轉等諸句,餘一切修多羅中廣說,應知。又復有義,言 不退者以得成就深心法故。

「又不退者,以得成就行心捨心故。言不轉者,以得成就深心法故。降伏一切諸魔怨敵者,以得成就善知迴向方便心故。如實知一切法自體相者,以得成就善知方便故。於諸世間心不疲倦者,以得成就大慈大悲心故。以心不疲倦故,不依他智速疾成就阿耨多羅三藐三菩提者,以得成就般若波羅蜜故。是故,佛告彌勒菩薩摩訶薩言:『菩薩摩訶薩畢竟成就八法,不退阿耨多羅三藐三菩提。』如是等。」

問曰:「何故如來唯說八法,不多不少?」

答曰:「此非正問。何以故?若多若少俱致問故。然佛世尊非無因緣說此八法,以此八法具足成就菩提因故。此明何義?成就深心乃至般若波羅蜜,畢竟成就此八種法,具足菩薩功德智慧,速疾成就一切種智。以此八法具足成就佛菩提因,是故如來唯說八法不多不少。

「又復所以唯說八法,以攝菩薩道故。此明何義?略說菩薩有二種道:一者、方便差別道;二者、慧道。成就深心乃至方便等諸句,示現方便差別道;成就般若波羅蜜者,示現慧道。是故《文殊師利問菩提經》中,聖者文殊師利言:『諸天子!菩薩摩訶薩略道有二,以是略道速得阿耨多羅三藐三菩提。何等為二?一者、方便道;二者、慧道。方便道者知攝善法,智慧道者如實知諸法智;又方便者觀諸眾生,智慧者離諸法智;又方便者知諸法相應,智慧者知諸法不相應智;又方便者觀因道,智慧者滅因道智;又方便者知諸法差別,智慧者知諸法無差別智;又方便者莊嚴佛土,智慧者莊嚴佛土平等無差別智;又方便者入眾生諸根行,智慧者不見眾生智;又方便者得至道場,智慧者能證一切佛菩提法智。』以是義故,但說八法不多不少。

「又復所以但說八法,以攝助道斷道故。此明何義?即彼修多羅中說:『復次,天子!諸菩薩摩訶薩復有二種略道,諸菩薩摩訶薩以是二道疾得阿耨多羅三藐三菩提。何等為二?一者、助道;二者斷道。助道者五波羅蜜,斷道者般若波羅蜜。』又從深心乃至方便以為助道,攝五波羅蜜:成就捨心攝檀波羅蜜;成就行心攝尸波羅蜜;成就深心攝羼提波羅蜜;成就善知迴向方便心、成就善知方便,攝毘離耶波羅蜜;成就大慈心、成就大悲心,攝禪波羅蜜;成就般若波羅蜜攝斷道,如是有礙道無礙道、有漏無漏等,皆可類解應知。

「又攝有量無量道故,如彼經中說:『復有二種略道。何等為二? 一者、有量道;二者、無量道。有量道者取相分別,無量道者不取 相分別。』又從深心乃至方便等七句,取相分別攝有量道應知;如 是成就般若波羅蜜,不取相分別攝無量道應知。如是四家四攝四無 量三十七品,諸菩薩摩訶薩一切功德,隨義相應八法皆攝應知。」

問曰:「應說深心義,云何深心義?」

答曰:「深心義者,心實不住非心相應慢使異相、五陰相應起業修行增長因果,深心因相違涅槃,果相違,修行善根非心相應,行屬陰聚體隨順涅槃果,如因聞慧生餘慧等,是名深心。又深心者,心少時住離心相應,善根行體依行起行,猶如流水次第生法,是名深心。

「又深心者,依種子生,猶如乳等一切白法,隨順因緣修行善法, 是名深心。又深心者,如久卷物雖暫牽舒放還依本,深心亦爾,隨 本因作法還續如本,不可說一不可說異,是名深心。又深心者,修 學白法名為深心。又深心者,修行一切諸善根法,成就不失不增不 減大涅槃法,名為深心。」

問曰:「如《毘摩羅吉利致所說經》說,菩薩摩訶薩修無量行有無量心。此深心者,為起何行?」答曰:「此深心者,悉能發起求佛菩提一切諸行,是名深心。何以故?以此深心發生一切菩提因故,悉能增長諸功德力,譬如尸羅。此明何義?如持戒人得善根尸羅,一切善法無量差別悉名尸羅,而身口意三業成就名為尸羅。何以故?身口意業與諸善法為根本故。深心亦爾,與佛菩提因一切善行以為根本故。是故《伽耶山頂經》中,月淨光德天子問文殊師利言:『諸菩薩摩訶薩深淨心,以何為本?』文殊師利答言:『天子!諸菩薩摩訶薩深淨心,以阿耨多羅三藐三菩提心為本。』以是

義故,此修多羅中所說深心,菩提心為本。如《金剛密迹經》中 說,諸菩薩摩訶薩深心功德不誑世間,以是故說為菩提因應知。」

問曰:「以何義故,得言菩薩成就深心?」

答曰:「以一切所治法不能動轉故。此明何義?以種種苦惱不能動轉一切菩薩求菩提心,彼時菩薩名為成就深心應知。

「又諸菩薩他身樂心有力降伏自身樂心故。此明何義?以彼菩薩自 求樂心,為與他樂深心降伏,彼時菩薩名為成就深心應知。

「又成就深心者,以至究竟故。此明何義?以依深心下中上法次第增長,乃至畢竟堅固名為成就深心應知。

「又成就深心者,以起難捨能捨心故。此明何義?若諸菩薩修行檀等難行布施,深心發起修行等心,彼時菩薩名為成就深心應知。如《聖者無盡意經》中說:『以頭施等難捨能捨。』名為成就深心應知。

「又成就深心者,以能降伏慳嫉等心故。此明何義?以諸菩薩得畢竟成就深心,能降伏慳嫉等菩提道相違法,彼時菩薩名為成就深心應知。如《聖者無盡意經》中說: 『大德舍利弗!諸菩薩深心者,降伏嫉妬教化慳嫉眾生故。』如是等名為成就深心應知。

「又成就深心者,以因果不盡故。此明何義?以諸菩薩深心因果無盡,彼時名為柔軟菩薩應知。因不盡者,修行廣大無量無邊故。果不盡者,一切佛法無量無邊,以不斷絕三寶因故。又《無盡意經》中說:『菩薩深心修行施等,以其能捨一切物故,是名菩薩成就修行。』如是等。又言:『大德舍利弗!諸佛如來十力四無所畏十八不共法,略說乃至一切佛法皆不可盡,是故深心亦不可盡。』以修行果不可盡故,故言菩薩成就深心。

「又成就深心者,依此經說應知,以此經中說:『彌勒!若菩薩摩 訶薩聞讚歎佛及毀呰佛,其心畢竟於阿耨多羅三藐三菩提堅固不 動,如是若聞讚歎法僧毀呰法僧亦復如是。』菩薩如是如實見知十 二因緣,即知諸佛如來法身,於三寶中成堅固心,以得無漏智畢竟 深心故,一切外道諸魔怨敵不能退轉,是故菩薩成就深心。」

問曰:「以何義故,先說深心次說修行?」

答曰:「以彼修行是證智因故。此明何義?以修行心能與深心作證 因故、以起大慈大悲心故,此心即是護持佛果應知,而彼深心不可 得見。以依深心故,眼耳等識於境界中不能發起損害等心,為利益 他離殺等行示現彼心,以是義故說深心後次說修行應知。又復示現 次第義故。此明何義?一切諸法應當如是次第生故,先說深心後說 修行。」

問曰:「云何修行義?」

答曰:「為利益他起不損害深心身口意業,攝自利行及利他行,是 名修行。」

問曰:「云何菩薩成就修行?」

答曰:「以不共外道、聲聞、辟支佛故。此明何義?以諸外道求世間樂修善業道,貪著世間樂果報故,所修諸行成世間果,以其成就世間果故,彼不能得成就修行。又以聲聞、辟支佛等求涅槃樂,修善業道離大悲心,成就小乘涅槃果故,彼聲聞人於菩薩果不得名為成就修行。菩薩過於一切世間,見諸世間種種過失,乃至不著轉輪聖王樂果報等,雖復能證小乘涅槃,依大慈悲勇猛心故,捨涅槃樂求佛菩提,修行十善業,為救一切諸眾生故,攝大勝願,其心唯以一切種智以為究竟,是故菩薩不同一切外道、聲聞、辟支佛等修行十善業道,是故名為成就修行。

「又成就修行者,受持增上十善業道故。此明何義?以菩薩修行過 於聲聞、辟支佛等十善業道,是故名為成就修行。諸菩薩摩訶薩有 五種法, 勝於聲聞十善業道。何等為五?一者、專心修行故;二 者、常修行故;三者、為安隱自身故;四者、為安隱他身故;五 者、善清淨故。專心修行者,畢竟不離一味心故。常修行者不斷不 絕,不休息故。為安隱自身者,為自身取人天安隱及大菩提故。為 安隱他身者,為與一切眾生安隱,畢竟迴向大菩提故,以救過於無 數眾生故。善清淨者,不破故、不點故、不污故、無所屬故、善究 竟故、不食故、智者讚歎故。破者,少分修治少分不修治故名為 破;是故菩薩具足修治名為不破。點者,自不修行教他修行故名為 點;是故菩薩自身修行教他修行名為不點。污者,自不修行不教他 修,見他修行而心隨喜故名為污;是故菩薩具足修行名為不污。屬 者,要依他智而能修行故名為屬;是故菩薩不依他智而能修行名無 所屬。善究竟者,專念畢竟欲心,專念畢竟愛心,專念畢竟恭敬 心,專念畢竟信心,專念畢竟畏心,專念畢竟無常心,以是義故名 善究竟。食者,迴向於有取,有資生故名為食;是故菩薩不取於有 名為不食。智者不讚歎者,聲聞、辟支佛乘中迴向世間,大乘中迴 向聲聞、辟支佛乘故,名智者所不讚歎;是故菩薩,聲聞、辟支佛 乘中不迴向世間,大乘中不迴向聲聞、辟支佛乘,是故名為智者讚 歎。

「又成就修行者,出過一切諸世間故。此明何義?以諸菩薩修行十善業道勝諸世間,是故名為成就修行應知!菩薩有五種法,修行十善業道,能過一切世間。何等為五?一者、願;二者、安隱;三者、深心;四者、善清淨;五者、方便。

「願者,菩薩摩訶薩凡所發願,一切凡夫、聲聞、辟支佛無如是願,是故菩薩依願修行十善業道,則能出過一切世間。如摩訶衍修多羅中《無垢德女所說經》言:『尊者目連!諸菩薩摩訶薩,從初

發心乃至道場,常為一切世間天人而作福田,勝諸聲聞、辟支佛 故。』

「安隱者,以諸菩薩雖為一切世間極深重苦之所逼惱,不能迴轉取 阿耨多羅三藐三菩提心,為阿耨多羅三藐三菩提故,專心修行十善 業道,是故菩薩依安隱心修行十善業道,則能出過一切世間。

「深心者,以最勝修行故,以諸菩薩最深愛心修行十善業道,是故 菩薩依深心故修行十善業道,則能出過一切世間。

「清淨者,除二地已上清淨菩薩。何以故?以諸菩薩摩訶薩等有三 種清淨修行十善業道,是故菩薩依清淨修行十善業道,則能出過一 切世間。

「方便者,菩薩於何等法中,以何等方便修行十善業道,餘世間眾生無如是方便,是故菩薩依方便力修行十善業道,則能出過一切世間。

「又成就修行者,以時等無量故。此明何義?以諸菩薩於無量世修 行十善業道無量行等,是故菩薩成就修行。

「又諸菩薩得五種法故,修行無量十善業道。何等為五?一者、無量世;二者、無量善法;三者、無量觀;四者、無量盡;五者、無量迴向。

「無量世者,以諸菩薩過無量世修行十善業道,是故菩薩於無量時 修行十善業道。

「無量善法者,以諸菩薩修行無量善法,以彼善法無量,是故菩薩 起無量善業道修行。如如來清淨毘尼大乘修多羅中說:『迦葉!如 四大海滿中生酥,一切眾生之所受用;菩薩摩訶薩修集一切有為善 根亦復如是,以諸菩薩迴向取彼無漏智故,能與一切眾生受用。』 「無量觀者,以為無量眾生觀故,以諸菩薩非為有量眾生修行十善業道,不作是念:『我為若干眾生修集善根,不為若干眾生修集善根。』以諸菩薩觀一切眾生修集善根,是故菩薩善業無量。

「無盡者,如如來清淨毘尼修多羅中說:『諸天子!譬如長者財富無量,是大捨者、行大慈者、行大悲者、大商主者,憐愍一切諸眾生故而修行者、不退心者,起如是心:「我能與彼一切眾生無量無邊安隱之樂。」諸天子!菩薩摩訶薩亦復如是,以住深心為諸眾生住安隱心起大精進心,作是思惟:「我當教化無量無邊苦惱眾生,皆悉安置涅槃樂中。」』是故菩薩修行無盡。

「無量迴向者,如初地中起無量願行十盡句等。菩薩以彼十盡無量 修行,善業道亦復無量,以依先迴向無量故,菩薩摩訶薩修行一切 善業道,果亦復無量,是名無量迴向。

「又成就修行者,以真實故。此明何義?以諸菩薩摩訶薩真實希有修行十善業道,是故菩薩成就修行。菩薩有五種法成就希有。何等為五?一者、起大勇猛心;二者、精進;三者、堅固;四者、慧; 五者、果。

「起大勇猛心者,發心能取阿耨多羅三藐三菩提,假使有人若以指 鉗或一指節,能舉三千大千世界無量劫住,此事非難,發心能取阿 耨多羅三藐三菩提是事為難,是故菩薩修行善業道成就希有。

「精進者,菩薩作是思惟:『眾生能發大勇猛心,無量無邊勤精進者少不足言,若能精進求菩提者是最希有。』是故菩薩若欲求於第一希有無量功德,依大精進修善業道,是故菩薩修行善業道成就希有。

「堅固者,以諸菩薩發大精進修行善業道,住第一希有堅固力中故,能進趣究竟精進,是故菩薩修行善業道成就希有。

「慧者,菩薩作是思惟:『勇猛精進堅固等法,皆依般若根本而有,是故般若希有之法。何以故?以依般若得有勇猛精進堅固。』 是故菩薩作是思惟:『依於般若希有之法修行善業道。』是故菩薩成就般若。

「果者,以依修行善業道等故能生果,證得無量無邊一切佛法,是 故成就希有之法。

「又成就修行者,方便攝取故。此明何義?以諸菩薩依方便力攝取 修行善業道故,不同聲聞辟支佛等,是故菩薩成就修行。菩薩有五 種法攝取方便應知。何等為五?一者、時處智;二者、迴轉入智; 三者、合智;四者、得意智;五者、次第智。

「時處智者,以何等時應說如是法?以何等處應說如是法?隨何等時應如是化眾生?隨何等處應如是化眾生?彼一切如實知。以依如是如是時處智,如是如是教化眾生,是名時處智。

「迴轉入智者,菩薩如實知諸眾生於外道法中應如是迴轉,如實知 於佛法中應如是入,如實知如是迴轉,如實知置安樂中,如實知如 是置佛法中,不復迴轉取外道法,彼處非十二因緣觀,是迴轉觀是 名迴轉入智。

「合智者,隨諸眾生以何等何等門相合善,知彼彼門依彼彼門合彼 彼眾生,如信如力如分教化是名合智。

「得意智者,知眾生意、知眾生信、知眾生求,如是知菩薩入彼修 行入信入求入於言語,隨順彼故起可化事,如是起不迴轉,是名合 智。

「次第智者,知眾生業次第覺展轉覺,所謂聲聞乘中說布施持戒人 天果報,說諸欲過,說在家染過,說出家利益,又說苦集滅道。次 說須陀洹、斯陀含、阿那含、阿羅漢果,次說不可壞解脫,次說無礙。於辟支佛乘中,說貯積過散用利益,說在家過出家利益,說戲 論過靜默利益,說聚落過阿蘭若利益,說多欲不知足過少欲知足利 益,說護諸根門於食知量。初夜後夜精勤修行,說觀中念想過樂空 閑處,說戒重三昧重般若重,不被譏呵讚歎自利益,讚歎深法非他 知,如是等於大乘中次第憂波提舍布施持戒忍辱精進禪定智慧,次 說實捨滅慧,是名次第智。

「又成就修行者,發菩提心十句、願十句、盡十句,遠離退轉法, 修行不退轉法,讚歎堅固精進,讚歎堅固心,讚歎安住智,是名菩 薩成就修行。

「又成就修行者,讚歎住地法,讚歎一向畢竟地法,說染退地法, 讚歎清淨地法,讚歎能進趣地法,讚歎住地中間可得法,說地退法 讚歎地果法,讚歎地習氣果法,是名菩薩成就修行。

「又成就修行者說諸地,所謂歡喜地、離垢地、明地、焰地、難勝地、現前地、遠行地、不動地、善慧地、法雲地,是名菩薩成就修行。

「又成就修行者,以諸菩薩深心攝取勝妙法故。此明何義?菩薩深心攝取妙法,為不斷絕三寶,為教化眾生行菩提行,為一切種智修善業道,是故菩薩成就修行善業道。

「菩薩有五種法攝取妙法。何等為五?一者、為欲報諸佛恩;二 者、為自身故令妙法常住;三者、供養佛故;四者、為欲利益無量 眾生;五者、難得妙法故。

「彼法復有五種法故,名為攝取妙法。何等為五?一者、自如實修行;二者、教他如實修行;三者、降伏諸魔惡刺;四者、捨黑阿波提舍;五者、攝取大阿波提舍諸比丘,是名菩薩成就修行。

「又成就修行者,以所作業無可譏呵故。此明何義?以諸菩薩一切 所作住持修行善業道等,皆不可譏呵,是名菩薩成就修行。有五種 法,諸業成就不可譏呵。何等為五?一者、有所為作一切能成;二 者、能得大果;三者、不違善法;四者、隨順清淨法;五者、德稱 名聞,是名菩薩成就修行。」◎

彌勒菩薩所問經論卷第三

「◎又成就修行者,以起一切種修行清淨故。此明何義?以諸菩薩 起一切種清淨十善業道,是名菩薩成就修行。如《十地修多羅》中 說,『是菩薩復深思惟,行十不善業道集因緣故,則墮地獄畜生餓 鬼;行十善業道集因緣故,則生人中乃至生有頂處。』又是上十善 業道與智慧觀和合修行其心狹劣故,心厭畏三界故,遠離大悲故, 從他聞聲而通達故,聞聲意解成聲聞乘。又是上十善清淨業道不從 他聞故,自正覺故,不能具足大悲方便故,而能通達深因緣法,成 辟支佛乘。又是上上十善業道清淨具足,其心廣大無量故,為諸眾 生起悲愍故,方便所攝故,善起大願故,不捨一切眾生故,觀佛智 廣大故,菩薩地清淨波羅蜜清淨入深廣行成。又是上上十善業道, 一切種清淨十力,力故集一切佛法令成就故,是故我應等行十善業 道,修行一切種令清淨具足故,是名菩薩成就修行。

「又成就修行者,以為利益一切眾生修行十善業道故。此明何義? 以諸菩薩不著自樂修行十善業道,為利益眾生見我能利益眾生,以 慈悲心非直自利能自利已,復能令他住十善業道,是故菩薩成就修 行。以是義故,《十地修多羅》中說:『是故我當先住善法,亦令 他人住於善法。』是故成就修行。又如《十地修多羅》中說:『是 菩薩復於一切眾生中,生安隱心、柔軟心、慈心、悲心、憐愍心、 利益心、守護心、我心、平等心、師心、生尊心。又菩薩復作此 念:「是諸眾生墮於邪見,惡意惡心行惡道稠林。我應令彼眾生行 真實道、住正見道如實法中。」』如是等。是故名為成就修行。」

「又成就修行者,修行善業道畢竟無盡故。此明何義?以諸菩薩為 不斷絕三寶,修行不斷絕,常修行善業道無盡,是故名為成就修 行。如《無盡意修多羅》中說:『大德舍利弗!諸菩薩摩訶薩尸波羅蜜無盡,以常修行故。何以故?凡夫戒者,在所受生是故有盡,人中十善盡故有盡,欲界諸天福報功德盡故有盡,色界諸天以禪無量盡故有盡,無色界天取入諸定盡故有盡,外道仙人所有諸戒退失神通盡故有盡,一切聲聞學無學戒入涅槃際盡故有盡,辟支佛戒無大悲心盡故有盡。舍利弗!菩薩淨戒皆無有盡。何以故?於是戒中出一切戒,如種無盡果亦無盡,是菩提種不可盡故,如來戒禁亦無有盡。』

「又成就修行者,遠離身見煩惱垢故。此明何義?以諸菩薩十善業 道離我見等垢,彼時名為清淨業道,是故菩薩成就修行,即彼修多 羅中說:『清淨戒者所謂不著我相戲論。』如是等。是故名為成就 修行。

「又成就修行者,以成就一切種清淨故。此明何義?以諸菩薩修行善業道一切種、一切眷屬清淨,彼時菩薩名善業道成就修行應知。如彼修多羅中說,無盡意言:『唯舍利弗!菩薩戒眾六十六事清淨,修治亦不可盡。何等名為六十六事?一者、於他眾生不起惱苦;二者、於他財物不生竊盜;三者、於他婦女終不邪視;四者、於諸眾生無有欺誑;五者、初不兩舌,於自眷屬知止足故;六者、無有惡口,忍麁獷故;七者、無有綺語,常善說故;八者、於他樂事不貪嫉故;九者、初無瞋恚,忍惡言故;十者、正見不邪,賤餘道故;十一者、深信於佛,心不濁故;十二者、信順於法,善法法故;十三者、信敬於僧,尊重聖眾故;十四者、五體投地志念佛故;十五者、五體投地思惟法故;十六者、五體投地宗敬僧故;十七者、堅持禁戒一切無犯,乃至小禁不放捨故;十八者、持不缺戒,不依餘乘故;十九者、持不穿戒,離惡處生故;二十者、持不荒戒,不雜諸結故;二十一者、持不污戒,專長白法故;二十二者、持是深戒,隨意迴向得自在故;二十三者、持讚歎戒,智者不

呵故;二十四者、持纯善戒,正念知故;二十五者、持不呵戒,一 切戒不散故;二十六者、持善堅戒、防護諸根故;二十七者、持名 聞戒,諸佛所念故;二十八者、持知足戒,無不厭故;二十九者、 持少欲戒,斷貪惜故;三十者、持性淨戒,身心寂滅故;三十一 者、持阿蘭若戒,離憒閙故;三十二者、持聖種戒,不求他意故; 三十三者、持威儀戒,一切善根得自在故;三十四者、持如說戒, 人無不歡喜故;三十五者、持慈心戒,護眾生故;三十六者、持悲 心戒,能忍諸苦故;三十七者、持喜心戒,不懈怠故;三十八者、 持捨心戒,離愛恚故;三十九者、持自省戒,心善分別故;四十 者、持不求短缺戒,護他心故;四十一者、持善攝戒,善守護故; 四十二者、持慧施戒,教化眾生故;四十三者、持忍辱戒,心無恚 礙故;四十四者、持精進戒,不退還故;四十五者、持禪定戒,長 諸禪支故;四十六者、持智慧戒,多聞善根無厭足故;四十七者、 持多聞戒,博學堅牢故;四十八者、持親近善知識戒,助成菩提 故;四十九者、持遠離惡知識戒,捨遠離惡道故;五十者、持不惜 身戒,觀無常相故;五十一者、持不惜命戒,勤行善根故;五十二 者、持不悔戒,心清淨故;五十三者、持不邪命戒,心行清淨故; 五十四者、持不焦戒,畢竟清淨故;五十五者、持不燒戒,修善行 業故;五十六者、持無慢戒,心下不憍故;五十七者、持不掉戒, 遠離諸欲故; 五十八者、持不高戒, 心平直故; 五十九者、持柔和 戒,心無抵突故;六十者、持調伏戒,無惱害故;六十一者、持寂 滅戒,心無垢穢故;六十二者、持順語戒,如說行故;六十三者、 持化眾生戒,不離攝法故;六十四者、持護正法戒,不違如實故; 六十五者、持如頌成就戒,於諸眾生心平等故;六十六者、持親近 佛戒,入佛三昧具足一切諸佛法故。』是故名為成就修行。

「又成就修行者,以成不共果故。此明何義?以諸菩薩成就修行十善 善業道攝取菩提心,以是義故得菩提時成不共果,是故名為成就修 行應知。如《聖者娑伽羅龍王經》中說:『龍王!離殺生人得十種 清淨法,遠離殺生,一切善根迴向阿耨多羅三藐三菩提,彼人得菩提時心自在故,壽命無量。』如是等。」

問曰:「應說業道義,云何業道義?」

答曰:「次說,云何說以造作故名為業相?即業名道,能趣地獄故名業道。又身口七業即自體相名為業道,餘三者意相應心,又即彼業能作道故名業道。此明何義?唯心是業,彼心七業共起名道,餘三共相應名為業道。」

問曰:「若即業名道,皆悉能趣地獄等者,何故餘三非是業道?」

答曰:「如彼七業,此三能作彼根本故、以相應故、不能如彼業故,不名業道。」

問曰:「一切美味、飲酒、食肉、捲手摑打、一切戲笑,如是等惡行,一切禮拜、供養、恭敬、遠離飲酒等,如是等善行,何故不說以為業道?」

答曰:「遠離飲酒等,唯是心業能起七業,非身口業,是故非業道;若作與心相應,亦是業道。」

問曰:「若即彼業能作道名為業道,如是相解業道者,一切法於心 皆應名業道。若爾,何故但說十種業道,不說無量業道?」

答曰:「以勝重故。此明何義?以諸惡行及善行中十業道重,餘非重故,不說無量。」

問曰:「此義不然。何以故?以業不定故。此明何義?或有近遠方便為重、正業為輕,是故不應但說十業以為業道,不說無量。」

答曰:「不然。何以故?十業多重、近遠方便多輕。又世間眾生多 畏十業,不畏近遠方便。又十業道能作深重逼惱,餘者不能,是故 汝說業不定者,是義已答。又汝向言一切法於心皆應名業道者,此 義不然。何以故?七業一向極重,意三亦輕亦重,飲酒等不爾。以 是義故,但說彼十名為業道,不說餘者名為業道。」

問曰:「遠離殺生者,殺生等相應說?」

答曰:「殺生有八種:一者、故心;二者、他;三者、定不定眾生相;四者、疑心;五者、起捨命方便;六者、作;七者、不作相; 八者、無作相。是等名為殺生身業。身口意業名為殺生。故心者。」

問曰:「有人言:不作心殺成殺生罪,譬如觸火。此明何義?如火能燒,若故心觸、不故心觸皆能燒人。殺生亦爾,若故心殺、不故心殺,悉皆應得殺生罪報。」

答曰:「不然。何以故?若無心殺得罪報者,則阿羅漢不得涅槃。 此明何義?以阿羅漢斷世間因,有不作心而殺眾生,如是亦應還生 世間,而實不然。以是義故,不故心殺不得罪報。又言如火者,此 義不然。何以故?以惡業中無惡心隔故。此明何義?猶如彼火,薪 炭等隔,觸而不燒,如是彼惡業中無惡心隔,雖復殺生不能與報, 是故火喻義不相應。」

問曰:「云何死者受苦,而殺生者不得罪報?」

答曰:「以心不壞故。又此義不然。何以故?離逼惱眾生有罪,離 利益眾生有福,如斷善根、慈悲、無諍、滅盡定等,得罪得福。」 ◎

◎問曰:「何故名他?」

答曰:「非自命故。」

問曰:「以何義故自斷命者不得罪報?」

答曰:「以無可殺、殺者故。此明何義?若有他人是可殺者,能殺生人得殺生罪。以自殺者無可殺境,即更無殺者,以無殺者故,自斷命不得惡報。又過去陰不續殺生等陰,是故自殺不得殺罪。」

問曰:「自殺身者,起於殺心斷人命根,破壞五陰捨離人趣,殺業成就,何故不得殺生罪報?」答曰:「若爾,阿羅漢人應得殺罪。此明何義?以死相羅漢自害其身斷己命故,彼阿羅漢亦應獲得斷命之罪。而彼無罪。何以故?以離瞋心等故,是故自殺不得殺罪。

「又定不定眾生相者,定眾生相、不定眾生相,彼眾生相名為定不 定眾生相。又定眾生相者,有百千人作心於中定殺某人,是名為 定,若殺彼人得成殺罪,若殺餘人不得殺罪。不定者,以捨一切故 隨殺得罪,以彼處不離眾生相故。

「疑者,疑心殺生亦得殺罪,以彼是眾生。既捨眾生,其心雖疑, 以捨慈悲心殺眾生故得殺生罪。

「起捨命方便者。此明何義?若殺者於彼事中起不善心,必欲斷彼 眾生命根,非慈悲心、無護罪心,捨眾生心作殺方便是名為起。

「又作不作相無作相者,作者所作事,不作者所不作事,彼作事共起,雖作業滅而善無記法相續不斷。」

問曰:「云何不作而名為業?」

答曰:「以能與作事作因、與作果事作因。此明何義?處處亦有因 中說果、果中說因,如如來經中說,可見可觸名無作色,以作不可 見不可觸而作,名為可見可觸。以彼不作說名可見可觸,如是彼處 若身所依身事刀杖等殺生,名為作不作,得名身業。又如自在人口 勅令殺仙人,瞋心欲殺眾生;受勅使者依自在人口勅而殺信仙夜 叉,依仙瞋心而殺眾生。彼自在人及仙人等作殺生因,使人夜叉身 業成時,彼自在人及以仙人俱得成就不作身業。又如受戒人,臨受 戒時身動口說,及受戒時默然而住身口不動,師羯磨已,彼人成就 無作身業,此亦如是。又如口業事,而口不言但動頭眴目奮眉舉手 如是等相表前事者,亦得成就不作口業。又應身作業,而身不動口 說種種身業方便,彼事成時亦得成就不作身業。

「有人言:口意亦得成就殺生,此殺生業是口意業非是身業。雖有此言,是義不然。何以故?若即口說心念之時成殺生者,可是口業?可是意業?此明何義?若口與意是殺業體,自在人勅殺某眾生,仙人心念殺某眾生,即勅念時彼命應斷,而此事不然。以彼使人信仙夜叉身業成時成殺生事。若不如是,彼自在人口言殺時,及彼仙人起瞋心時應即成殺,而實不成。又復有過,彼自在人口勅殺生,使人未殺,彼自在人得證見道,受勅使者後方殺生。若口勅殺已成殺者,證見道已然後殺生。而此義不然,以得遠離彼殺生因破戒等惡心,是故不以口意二業為殺生體。何以故?以業無差別故。此明何義?以善、不善、無記等業相各異故。以無差別相,如是身口意業則無差別,而遠近方便身口意等成殺生業,此則不遮。」

問曰:「口言殺者,為畢竟成、為不成耶?」

答曰:「不成。何以故?以過時等故。此明何義?以何等時、以何等方便、以何等處?彼人殺時過自在人說時處等,殺者得罪,教者無罪。身業者,依身作業名為身業。此明何義?依身作業,隨身所作名為身業。」

問曰:「無命可殺,云何斷命得殺生罪?」

答曰:「雖無實命,斷和合體名為殺生,如斷樹林滅燈炷等,若有神我神我是常,無殺生義。」

問曰:「害何等陰名之為殺?為害過去、為害未來、為害現在?若害過去過去已滅,若害未來未來未到,若害現在剎那不住。」

答曰:「有人說言:住現在世,壞未來世,和合陰體。復有人言:壞未來、現在。此明何義?以現在陰中刀杖能到能作害事。復有人言:五陰自滅非因緣滅。復有人言:現在陰中唯壞色陰,以刀杖等能割能觸,餘四陰者不可割觸故。復有人言:殺害五陰,自餘四陰雖不可觸而依色陰住,色陰壞故彼亦隨壞,如破瓶故水乳亦失。復有人言:唯害無記陰,以無記陰中刀杖能觸,以無觸陰有其二種、一切業有三種,如向所說應知。」

問曰:「如來修多羅中說有二種業:一者、起業;二者、作業。此 二種業廣說有三,謂身口意業。此三種業云何差別?為從依說、為 從體說、為從起說?若從依說,即是一業,以一切業依止身故。若 從體說,即是一業,以一切業唯口業故。若從起說,即是一業,以 一切業從心起故。」

答曰:「依三次第有三種業。此明何義?由心思惟即是心業,依彼心業起身口業。以依心故起身口業,如是次第應知,彼作無作應知,彼身口業差別應知。又身業作者依身威儀,依止身作彼彼形相,是名身作業。」

問曰:「以身去來動轉名為身業,不去不來不名為業?」

答曰:「若言去來是身業者,此事不然。何以故?一切有為法剎那不住故。剎那不住者隨何處滅?不去不來。云何而言去來動轉名為身業。」

問曰:「此義不然。何以故?若一切法剎那不住,可如是說,亦見有法剎那間住非是不住,云何而言無去無來?」

答曰:「此義不然。何以故?以有為法畢竟不住。此明何義?以彼一切有為諸法,無因無緣自然而滅故。此復何義?以可作法是有因緣而滅,法者即是無物,若無物者彼法不作,以有為法無因無緣自然滅故。若法即生時不滅。後亦不應滅,若不滅者應是定實,若是定實不應變異,若如是者,不應從彼滅因緣滅。」

問曰:「我見有法從因緣滅,如薪等法從彼火等因緣而滅。一切量中現見量勝,以是義故,一切法滅從於因緣。」

答曰:「云何知薪等法依於火等因緣而滅?我言無因自然而滅,此義應思,為因火等薪等法滅故不見耶?為無因緣自然而滅故不見耶?此義云何?本相續因緣滅,餘更不生,是故不見,非因緣滅,如風滅燈手滅鈴聲,如是等知是比智知。」

答曰:「已說非可作事故。此明何義?若有一法從因緣滅,應一切 法皆因緣滅,不應有法非因緣滅,猶如生法,一切皆悉從因緣生, 無有法生不從因緣,如心、聲、焰非因緣滅,以彼不待因緣滅 故。」

問曰:「此義不然。何以故?以後心生前心滅,後聲生前聲滅,以彼先法待後法故,是故得知從因緣滅。」

答曰:「此義不然。何以故?以彼心聲不相待故。此明何義?以有疑知決定知故,二法不俱,苦樂貪恚等皆亦如是。又以前心聲疾後心聲遲,云何不疾心聲而能害彼疾心疾聲?是故法滅不從因緣。」

問曰:「雖燈與焰念念不住,以無因住而有滅法及滅非法,依彼滅法滅於燈焰,是故應依因緣而滅。」

答曰:「此義不然。何以故?以無物法,云何能作滅因?又生因滅 法非法剎那不住,剎那心剎那心中終不能作生因滅因,如是一切有 為諸法不從因滅應知。

「又答:若依火等能作薪等滅因,如是生因即是滅因。此明何義? 依何等火焰生何等色,即彼火焰能作熟勝、熟勝滅因,以是故即生 因是滅因,更無異因。而此義不如是,云何此一法能令法生、能令 法滅?又,異異火焰中如是因差別虛妄分別,如因灰汁、苦酒、雪 日、地水、穀米能生熟異,熟異等色,彼處云何分別?」

問曰:「不然。何以故?以火煎水,水由火盡,火為滅因。」

答曰:「如向解釋,云何得知水因火滅非自然滅?」

問曰:「若爾,火何所作?」

答曰:「火界增上,依彼火力水力漸微,乃至後時水相續體斷絕不起,是火所作非火所滅。是故一切有為之法自然而滅,無因緣滅,以彼滅法剎那不住是故即滅,如是成就諸法剎那不住剎那不住,是故此法不彼處去。」

問曰:「我於餘處猶見此法,若法不去,云何而得於餘處見、於餘處識?」

答曰:「如草火焰,是故不去。是故身威儀名身作法,此義已成, 非謂異身別有實法。如一方生色名為長色,依彼長色更見餘色名為 短色,依四方故見四方色,依圓物故名為圓色,如是長短方圓高下 諸色。譬如挑火,一廂直去不斷不絕相續而見名為長火,周匝四廂 不斷不絕名為圓火,隨種種轉見種種火,如是離火更無別有實形相 法。若離火外有形相法,應為二根所伺,眼根見長、身根觸短,以 一色入非二根見,如觸法長短等。如是色中應知,觸法唯心,非是 現根可捉可知,如見火色觸中生念知,如嗅華香色中生念,此法應如是,依餘法念餘法而無一觸法,於威儀中實有依觸法得餘法,是故無實身威儀法。」

問曰:「此義不然。何以故?若於闇夜遠見土牆等色,或長或短此應是實。」

答曰:「但見色,不了虛妄分別長短等色,如不異蟻子等見行見 圍,此亦如是,異身威儀更無實法,唯身威儀名為作法,不離身外 別有作法。向說心思惟者,心中分別我如是如是作,能生身口業名 為心業,若身所作名為身業,若口所作名為口業,不異三業別有實 法。」

問曰:「異身口業實有別法。何以故?以有三種無垢色增長不作業道等故。此明何義?以如來修多羅中說色攝三種。何者為三?一者、有色可見可礙;二者、有色不可見可礙;三者、有色不可見不可礙。無垢色者,謂無漏色。何者無漏色?無漏色者謂無漏法。何者無漏法?謂於過去未來現在色中不生瞋愛,乃至識中不生瞋愛,以是義故名無漏法。若如是者,離無作法何處有色不可見不可礙是無漏?故知應有無作法離身口意業增長者。如來修多羅中說:『有信者善男子、善女人修行七種功德,行住睡寤等日夜常生功德增長功德。』若離身口業更無無作,云何異心法而得增長?是故當知,離身口業有無作法。又自不作業使他作業,若無無作此云何成?

「又復非但使人作業即得名為成就業道,以彼業未成復更有過。雖 作業未有實體成就,以如來經中說:『諸比丘!外入十一入不攝, 不可見不可礙。』而不說非色。此為何義故如是說?以如來見法入 中攝無作色故如是說。 「又復作難,若無無作法亦應無八聖道,以定中無正語、正業及以 正命,當知決定有無作法。又復有難,若無無作法,離波羅提木叉 亦應無無作戒,以受戒竟後即無故,以在睡眠及顛狂等諸失心者, 亦名比丘、比丘尼故,當知決定有無作法。復有修多羅中如來說言 離破戒橋梁,若無無作法,云何說言離破戒橋梁?是故當知有無作 法。」

答曰:「此難極繁,雖有種種眾多言說而義皆不然。何以故?汝向雖引如來修多羅中說色三種,而汝不解如來經意。此義云何?一切聖人禪定力見三昧境界色,依三昧力而生彼色,彼色非是眼根境界故不可見,餘一切物所不能障故不可礙。」

問曰:「若言非是眼根境界不可障礙,云何名色?」

答曰:「汝離心意有無作色,云何得名為無作色?又答:此色乃是無漏境界聖智三昧色,不同世間有漏之色。又言無漏色者,即是依彼三昧禪定力色名為無垢,聖人於無漏三昧中說無漏法。

「又有人言:阿羅漢色及以外色名為無漏,以離有漏法故。我不受此義。又增長功德者,此義云何?法如是故,如是如是施主施物數數受用,如是如是數數受用者,依受用人功德力故,雖施主異心而依本心念,修相續體細細轉勝。以轉勝故,於未來世而得成就多福德果。依此義故,如來說言多生功德增長功德,非離心離色有無作法。」

問曰:「云何異身心依異身心,異身心中相續轉細增長福德?」

答曰:「云何異身心依異身心,異身心中有無作法?又答:而此義不然,我依於心身業口業有善惡功德,依本心作不失本心有相續體,癲狂睡等常得增長。不作者,己自不作、使他人作,云何而得成於業道?此明何義?以依使者於他眾生起於害法,是故使者細相

續體轉轉生麁,以是義故未來世中能生多過。亦復不但使人作惡, 自作惡者作惡事竟,未來世中亦生多過,是故於彼未來身體相續轉 生名為業道,以於因中明果義故。離破戒橋梁者,汝今為有狂癲病 耶!而作是說。若狂癲者速覓陳酥服令除愈,不應種種非法言 說。」

問曰:「何故增我有無作法,而汝自立從心起於細相續體有增長法。」

答曰:「我不增汝有無作法,而汝所說法無如是義。此明何義?以 依心故身口行事,行事訖竟成就業道。汝所有法離心身口,於佛法 中無如是義,是尼乾子微塵、世性、時方等法離心而有,無心善惡 如是等法智者不受,是故不立離於色心、身心之外有無作法。」◎

彌勒菩薩所問經論卷第四

◎「遠離偷盜者,偷盜有九種:一者、他護;二者、彼想;三者、疑心;四者、知不隨;五者、欲奪;六者、知他物起我心;七者、作;八者、不作相;九者、無作相,是等名為偷盜身業。他護者,此明取他護物。彼想者,若不生自想、不言是我物,名為彼想。疑心者,若心有疑,為是我物、為是他物?而彼物他物。知不隨者,知他物,生心他隨我想。欲奪者,起損害心。知他物起我心者,若不異見若闇地取,若疾疾取若取餘物,若取他物取自物想。作不作相無作相者,如前殺生中說。成業道不成業道,隨義相應解釋應知。

「遠離邪婬者,邪婬有八種:一者、護女人;二者、彼想;三者、疑心;四者、道非道;五者、不護;六者、非時;七者、作;八者、無作相,是等名為邪婬身業。護女人者,所謂父護母護如是等。彼想者,若知彼女是父母等所護女想,非不護想。疑心者,若生疑心,為自女為他女,為父母護為不護,為我女為他女,而彼女人為父母護,於彼父母所護等女一一邪婬。道非道者,道者所有道、非道者謂非道,彼護女非道非時者亦名邪婬。又非護者,自護女不護女,彼非道邪婬。又非護女者,一切不護女等邪婬。作無作相者,如前殺生中說應知。不作相者,邪婬中無如是不作法,以要自作成故,如病人服藥,因服藥故遠離於病生於無病。病者得差,藥師病不差。

「遠離妄語者,妄語有七種:一者、見等事;二者、顛倒非顛倒 事;三者、疑心;四者、起覆藏想;五者、作;六者、不作相;七 者、無作相,是等名為妄語口業。見等事者,謂見聞覺知於顛倒非 顛倒事中。又顛倒事者,如聞如彼事。非顛倒者,謂如彼事。疑心者,生疑,為如是、為不如是?為一向如是、為一向不如是?起覆藏想者,覆藏實事,異相事中住異相說。作不作相無作相者,如前殺生中說。

「有人言:身相及布薩中默然而住,皆有妄語,不作相成身意業以為妄語。雖有此言而義不如是。何以故?以業異相故。異相者,以身口意業異相故,是故口業非身意業體,而依本口業世間用事,而口業事身業示現,名為不作口業而口業得名,若布薩中比丘不說而成口業。何以故?以依口業立制故,以先受是語:『我於佛法中不作如是法、作如是法。』而彼人先有要心而後時不說默然而住,彼人退本要心所受,是故得成妄語口業。

「遠離兩舌者,兩舌有七種:一者、起不善意:二者、實虛妄:三者、破壞心:四者、先破不和合意:五者、作:六者、不作相:七者、無作相,是等名為兩舌口業。不善意者,不善業煩惱心相應。實虛妄者,知他他心壞若實若妄語,壞他心破他心,以先破者無和合心,以起惡意起自身不善法,是名兩舌。作不作相無作相者,如前殺生中說。

「有一人言:破壞無作業,兩舌中無如為破僧兩舌,而說於如來邊 不能破壞,是則不成破僧惡業。如是不破壞不兩舌業遠離。

「惡口者,惡口有七種:一者、依不善意;二者、起惱亂心;三者、依亂心;四者、惡言說他;五者、作;六者、不作相;七者、無作相,是等名為惡口口業。依不善意者,口說惡言令他聞者能生苦惱。起惱亂心者,但起惱亂心不起安隱心,若為安隱心,雖惡口說無惱亂罪。依亂心者,起如是心隨他聞時亂,以不亂作惡心說。作、不作相、無作相者,如前殺生中說。

「遠離綺語者,綺語有七種:一者、依不善意;二者、無義;三者、非時;四者、惡法相應;五者、作;六者、不作相;七者、無作相。遍一切惡口,是等名為綺語口業。依不善意者,依欲界修道煩惱心相應,說名為綺語。無義者,離實義故。非時者,語雖有義而非時說,亦成綺語;又有時說,於大眾中為自在人說亦成綺語。惡法相應者,謂一切戲話非法歌舞等,一切不與善法相應者皆是綺語。作、不作相、無作相者,如前殺生中說。

「貪者,為愛心所纏,欲得他人錢財。為愛心貪心之所堅縛求他人 自在,是名貪相應知。

「瞋者,於他眾生起於惡心,欲打害等,大慈悲心相違是名為瞋。 眾生者,離非眾生事故。他者,離自身事故。言他眾生瞋者,於他 眾生起於惡心。害者,無慈心。打者,無悲心,以欲斷命故。又打 者,以鞭杖土石等能生苦惱皆名為打。慈悲相違者,欲斷他命,慈 心相違;打者,悲心相違,如是等是名瞋相應知。

「邪見者,於施等中見無施等。此明何義?於施中見無施,於與中 見無與,於捨中見無捨,如是等見名為邪見。」

問曰:「云何如是名為邪見?又施與捨三句有何差別?」

答曰:「施者正心施與福田非福田,與者亦正心施與福田非福田, 捨者但正心施與福田。又言:見無施者,見所施不清淨故。又言: 見無與者,謗無施主功德故。又言:見無捨者,謗無受者功德故。 如是不正見皆慳人相,以見富人慳惜貧者能捨,此人起如是心。若 實有施者,慳人不應富。何以故?以其先世習慳來久故。復生疑 心,此能施主不應貧窮。何以故?以其先世習施來久故。彼人雖生 如是邪見,而義不如是。」

問曰:「若爾,此義云何?」

答曰:「彼人過去雖久習慳,而忽值遇清淨福田,於彼田中少行布施,是故獲得今身富報,以習成性慳猶不捨。貧能施者,此復云何?彼人過去於非福田無信心故、不至心故、為名稱故、為求事故、求尊重故,彼人能施,以是義故不得富報,習施來故今猶能捨。無善行惡行者,此依自身見常無常起於過相。無善惡行業果報者,彼人見有行善者受苦、行惡者受樂,是故彼人生如是心,苦樂果報自然而有非從因緣。無此世他世者,彼人心見即此世滅,以不見更生故,此人起心言無後世。彼人復生是心,實無有我;若有我者,世間則無化生眾生,以不觀察十二因緣故。復生疑心,一切男女為自樂故而行婬欲,不為生我,我依自業於此中生,如濕生眾生依濕地生,濕地非是眾生父母,我亦如是。又見羅漢求冷求熱求飲食等,便謂世間無阿羅漢。何以故?以阿羅漢有愛心故,彼人自無修行等力,是故不能斷諸煩惱,便謂世間無阿羅漢。」

問曰:「應說離殺生義。以何義故得名為離?為有可殺事故得名為離、為無可殺事故而名為離?若有可殺事故名為離者,離義不成。何以故?以作習果成故,云何而言離於殺生?若無可殺事故名為離者,則無離殺生福,如無兔角可以割截,則亦無有離割截義。又言離殺生者,名為不殺生事,不捨攝眾生事。」

答曰:「以受不殺生法,依本受心有力故,不作彼殺生惡事,以受 離殺生法,以起善法,是故離殺生,不離攝取眾生。」

問曰:「為於可殺眾生邊離殺生、為於不可殺眾生邊離殺生、為於可殺不可殺眾生邊離殺生?」

答曰:「於可殺不可殺眾生邊離殺生。何以故?以起惡心不休息故,是故名為離於殺生。此明何義?若於可殺眾生邊離殺生,不可殺眾生邊不離殺生者,離義不成。此復何義?以離可殺眾生邊罪,成不可殺眾生邊福。以是義故,於可殺眾生邊、於不可殺眾生邊成

離殺生福。若不如是,不得言離殺生事,不成捨殺生事,不受殺生事,應得離殺生事。若不如是,不受應是離,受應是不離。」

問曰:「要依現在陰界入邊得離殺生,非過去未來?」

答曰:「若如向問答者,不成離殺生義。」

問曰:「應說離殺牛等有幾種離?」

答曰:「有三種離:一者、成;二者、依;三者、起。依者、成者,殺生、惡口依眾生以瞋心成,偷盜、邪婬依資生以貪心成,妄語、兩舌、綺語依名字以貪心成,邪見依色以癡心成。

「起者,十不善業道一切皆從貪瞋癡起。依貪心故起殺生者,貪心殺生或為皮肉筋骨齒角錢財等故,斷眾生命。或為自身、為所愛者,一一具足三事。依瞋心故起殺生者,以瞋心故殺害怨家及殺怨所愛人,是名依瞋心故起於殺生。依癡心故起殺生者,如有人言:殺蛇蠍等雖殺無罪。何以故?以生眾生諸苦惱故。又有人言:若殺麞鹿水牛羊等,無有罪報。何以故?以是眾生業所感故。又波羅斯等言:殺老父母及重病者,則無罪報。如是等名依癡心故起於殺生。

「依貪心故起偷盜者,以須如是如是物故,取如是如是物,或為自身或為他身或為飲食,是名依貪心故起於偷盜。依瞋心故起偷盜者,於瞋人邊及瞋人所愛偷盜彼物,是名依瞋心故起於偷盜。依癡心故起偷盜者,如婆羅門言:『一切大地諸所有物唯是我有。何以故?以彼國王先施我故,以我無力故為餘姓奪我受用,是故我取即是自物不名偷盜。』而彼癡人生是心故有是偷盜,是名依癡心故起於偷盜。

「依貪心故起邪婬者,謂於眾生起貪染心不如實修行,是名依貪心故起於邪婬。依瞋心故起邪婬者,於他守護若自護若他護資生,依瞋心故起不如實修行,如怨家妻邊及怨所愛人妻邊,是名依瞋心故起於邪婬。依癡心故起邪婬者,如有人言:譬如碓臼、熟華、熟果、飲食河水及道路等女人,如是邪婬無罪。又如波羅斯等邪婬母等,是名依癡心故起於邪婬、妄語。

「貪心生者,依貪心起瞋心生者,依瞋心起癡心生者,依癡心起如是兩舌惡口綺語皆亦如是。應知貪依貪心起者,依貪結生次第二心現前,如是名為依貪心起,依瞋結生名為依瞋心起,依癡結生名為依癡心起,如貪瞋與邪見,皆亦如是應知。」◎

◎問曰:「何故不說作、不作相、無作相,決定何業中有、何業中無?」

答曰:「唯除邪婬,餘六業道中悉皆不定。此義云何?若自作者成就作業及無作業。若使他作,唯有不作、不得有作。於邪婬中決定有作,不得有不作。何以故?以此邪婬畢竟自作,無使他作。是故經言:『頗有非身作業,而得成就殺生罪不?』答言:『有。口使人作成就殺罪。』又問:『頗有非口業作,而得成就妄語罪不?』答言:『有。以身業作,成就口業妄語之罪。』又問:『頗有非身業作非口業作,而得成就身口業不?』答言:『有。以依仙人瞋心故,以唯欲界色身善業道中畢竟有作及以無作,禪無漏戒無無作戒。何以故?以依心故。中間禪不定,若深厚心、畢竟恭敬心作身口業,成就作業及無作業。若深厚結使心起身口業,亦成就作業及無作業。若非深厚心、非畢竟恭敬心造身口業,唯有作業、無無作業。若非深厚結使心發身口業,亦唯有作業、無無作業。二」

問曰:「於業道中何者是前眷屬?何者是後眷屬?」

答曰:「若起殺生方便,如屠兒捉羊,或以物買將詣屠所,始下一刀或二三刀,羊命未斷,所有惡業名前眷屬。隨下何刀斷其命根,即彼念時所有作業及無作業,是等皆名根本業道。次後所作身行作業,是名殺生後眷屬業,乃至綺語皆亦如是應知。自餘貪瞋邪見等中無前眷屬,以初起心即時成就根本業道故。

「又身口意十不善業道,一切皆有前後眷屬。此義云何?如人起心欲斷此眾生命因,復更斷餘眾生命,如欲祭天殺害眾生,即奪他物欲殺彼人復婬其妻,生如是心還使彼妻自殺夫主,復以種種鬪亂言說破彼親屬,無時非實於彼物中生於貪心,即於彼人復生瞋心,為殺彼人故生如是邪見,增長邪見以斷彼命。復欲殺其妻男女等,如是次第具足十種不善業道,如是等業名前眷屬,一切十不善業道皆亦如是應知。又離善業道非方便修行,善業道是方便,以遠離根本故,及遠離方便故。言方便者,如彼沙彌欲受大戒,將詣戒場禮眾僧足,即請和上受持三衣,始作一白作第二白,如是悉皆名前眷屬。從第三白至羯磨竟所起作業,及彼念時起無作業,是等皆名根本業道。次說四依乃至不捨所受善行,身口作業及無作業,如是悉皆名後眷屬。」

問曰:「應說不善業道,於五道中何道具足、何道不具足?何道中多、何道中少?」

答曰:「地獄有五不善業道,兩舌、綺語、貪、瞋、邪見。此義云何?不殺害他故無殺生,無他護心是故無盜,無護女人故無邪婬,以無正心故無妄語,以常無有正念相故,無破壞心故無惡口,以常破壞故,依苦惱逼故有兩舌,有非時說故有綺語。貪瞋邪見以畢竟有故名為有,非是現有。以是義故,一處說有一處說無。如北欝單越無前六種、有後四種,以命定故無有殺生,以無守護故無偷盜,無護女人故無邪婬。彼人欲受婬,欲樂時即捉女人將至樹下,若樹曲枝覆彼人者則行婬;欲受婬欲樂,若樹不覆,彼人慚愧即放而

去。無誑他心故無妄語,以常定心故無兩舌,常柔軟語故無惡口,以有歌舞故有綺語,餘意業者以畢竟有非是現有。

「又除欝單越,餘三天下受十業道,北欝單越亦離不善業道,畜生 餓鬼欲界天中亦離受十業道,欲界中天離無受戒不善業道,雖天不 殺天而天亦殺餘道眾生。又有人言:天中亦有截手足等即時還生, 若斷其頭若中間斷絕即死不生,亦有殺他盜他物等不善業道,色無 色天中無不善業道。」

問曰:「不善業道於諸道中各有幾種?」

答曰:「地獄、北欝單越無貪無瞋亦無邪見,以畢竟有非是現有;餘三天下及欲界天離受法有受法。又欲界天有善無漏受法應知,畜生、餓鬼亦無受法,色界天中有受法,現前受善法攝取故。又彼處所有聖人生者,有依無漏善業道,無色界中唯有心業道,以成就業非是現有,色界天中雖復成就非是現有。彼處所有聖人生者一切現有,以依無漏持戒力故。」

問曰:「應說十不善業道果及隨順因。」

答曰:「有三種果:一、果報果;二、習氣果;三、增上果。一一業道皆有三種。此義云何?具足十不善業道下中上生地獄中,是名果報果。習氣果者,從地獄退生于人中,依殺生故有斷命果,依偷盜故無資生果,依邪婬故不能護妻,依妄語故有他謗果,依兩舌故眷屬破壞,依惡口故不聞好聲,依綺語故為人不信,依本貪故貪心增上,依本瞋故瞋心增上,依邪見故癡心增上,如是一切名習氣果。增上果者,依彼十種不善業道,一切外物無有氣勢,所謂土地高下,雀鼠雹棘,塵土臭氣多有蛇蠍,少穀細穀少果細果及以苦果,如是一切名增上果。復有相似果,殺者故與所害眾生種種諸苦,因彼苦故生地獄中受種種苦,以斷他命後生人中,得短命報斷

他暖觸,是故一切外物資生無有氣量。如是一切十業道中,隨義相 應解釋應知。劫奪他物、邪婬他妻,雖不生他重逼惱苦而破壞心, 是故受罪。雖不破壞不瞋不惡口,而由惡心是故得罪。」

問曰:「故心起作一切惡行,為決定成就不善惡業,決定受彼惡道苦果?為不決定成就惡業,不決定受惡道苦果?若諸惡業決定受者,惡道罪業不可得過。此明何義?以畢竟成就惡道罪業墮惡道等,除五逆業,從無始世來所習作業取惡道罪,畢竟定者一切惡道不可得過。又空修梵行,又與修多羅相違,如如來修多羅中說,有人修習不善業道,所得罪報應地獄受,彼人即於現身中受。如是等若彼五逆罪等果報,畢竟在於地獄中受。何故說言惡道罪業可得迴轉?云何而言惡道等罪現身中受?又復有過,若地獄等惡道罪業現身中受,若如是者因果雜亂。何以故?以時果輕重悉不定故。」

答曰:「有人言:現身中受地獄罪者,此人見實諦故,於現身中受少罪果。而此義不然。何以故?以業無自在故。此明何義?一切所作罪業福業無自在力,而隨何等因緣和合,依彼因緣應現身中受果罪業後身中受,應後身受果報罪業現在身受,而有勝義。若業應受樂果報者則受樂果,應受苦果則受苦果,是以依不定業故如是說。又依不定相似業故,作如是說,亦非依定果。何以故?以無得解脫果故,以阿羅漢受波羅提木叉戒、禪定戒、無漏戒業,乃至命未盡來常有不斷波羅提木叉戒等,若有果報則不得解脫,是故現受不定業果。」

問曰:「若如是者,諸業不定,亦與修多羅相違。何以故?以如來 修多羅中說,故作習業不受果報,無有是處。而彼習業,若現身 中、若後身中,畢竟定受。」

答曰:「此義不然。何以故?以諸因緣未和合故未受果報。此義云何?習作諸業雖實能受現身果報,而現不受?何以故?以諸因緣未

和合故,猶如種子。此明何義?猶如種子依於地等因緣和合能生芽等。此亦如是,依於識住因緣和合,業不淨識種子能生名色芽等。此明何義?若依如實修行、隨順如實般若,如實知有為行斷諸煩惱時,依聖道力故,修集諸功德能生善根芽。彼時雖有受後生業,以其無有煩惱伴侶,是故不能受後生果,以斷煩惱故。雖復不受後身果報,而猶依彼不善業道,於現身中少受習果,故不畢竟惡道中受,如修多羅中如來說言:『應如是受。』應如是受者,此明何義?雖少受喜樂、雖少受憂惱,而善不善業即時受盡,乃至少受頭痛等苦,此受少罪。彼相似果,向言修多羅相違者,此義不然。何以故?以依不定果報。依未治所治業,修多羅中作如是說:『若畢竟定心作業。不受果報。無有是處。』此明何義?阿羅漢人斷生後報罪福等業,於現身中受報因緣不復和合。若如是者,彼阿羅漢依此業道可不入涅槃。以是義故,知汝不解如來所說修多羅意。」

問曰:「應說清淨不清淨戒。云何清淨戒?云何不清淨戒?」

答曰:「有同戒清淨,聲聞、辟支佛、菩薩同修五種清淨戒法應知。何等為五?一者、根本清淨;二者、眷屬清淨;三者、覺觀不亂;四者、攝取念;五者、迴向涅槃。根本清淨者,遠離根本業道罪故。眷屬清淨者,遠離殺生等方便行故。覺觀不亂者,遠離欲害瞋恚等覺所有惡行故。攝取念者,攝取念佛念法念僧等諸念故。迴向涅槃者,為涅槃護戒、不為世間資生故,此是少分同戒。諸菩薩摩訶薩勝戒者,依初發菩提不損害心所起戒聚,乃至八地無量時修一切戒聚,以利益他心迴向薩婆若智,離一切習氣得大涅槃,是諸菩薩摩訶薩一切戒善清淨應知,自餘依師教持戒等皆不清淨。」

問曰:「持戒有幾種?」

答曰:「略說則有一種持戒,依不損害心不顛倒心起身口業。又有二種:一者、受戒;二者、法戒。又有三種:謂學、無學、非學非

無學。又有四種:一者、受波羅提木叉戒;二者、禪定戒;三者、無漏戒;四者、遠離煩惱戒。波羅提木叉戒者,所謂受世教戒,如七眾所受戒。禪定戒者,謂有漏所轉戒、無漏所轉戒。無漏戒者,謂學無學戒。遠離煩惱戒者,所謂依厭欲事中間道所轉,彼戒破戒及彼能起破戒因緣煩惱對治。

「又,言有漏者,依禪定戒說。言無漏者,依無漏定戒說,又有五種:欲界、色界、無色界、作不作、無漏不作。復有六種不貪等作戒三種差別,無作三種差別。復有七種,謂離殺生乃至綺語,即此七種依作無作差別,有十四種。即此七種,依不貪等起,有二十一種。即此七種,依作無作差別有四十種,依剎那展轉差別有無量種。」

問曰:「何者是戒果?」

答曰:「有漏定戒、無漏定戒,彼屬界、依屬界,即是相應果應知。無漏戒者,以離煩惱有二種果,諸菩薩摩訶薩為薩婆若持戒,取佛菩提果,離殺生等十善業道勝果,諸修多羅中如來廣說,如彼一切修多羅中應知。如《娑伽羅龍王所問經《中,如來說言:『龍王!離殺善男子善女人,獲得十種離煩惱熱清涼之法。何等為十?所謂一者、施與一切眾生無畏;二者、安住大慈念中;三者、斷諸煩惱過患習氣;四者、取無病果;五者、種長壽種子;六者、諸非人等常所守護;七者、睡寤安隱;八者、不見惡夢離怨恨心;九者、不畏一切外道;十者、退生天中,是名十種離煩惱熱清涼之法。龍王!若不殺善根迴向阿耨多羅三藐三菩提者,彼人得菩提時心得自在,是故壽命無量。』乃至正見道中皆應廣說,如一切修多羅中應知。」◎

彌勒菩薩所問經論卷第五

後魏天竺三藏菩提流支譯

◎成就捨心者。

問曰:「以何義故?說持戒後次說成就捨心。」

答曰:「以見作他利益力故。此明何義?以菩薩持戒,依持戒故得生善道,雖成就捨心而無具足資生。若爾,不能作他利益,又復不能成就諸餘一切功德。何以故?為他利益攝取世間,而彼菩薩利益他時離捨財物,不能成就。以是義故,依他利益說持戒後,次說成就捨心。

「又復有義,持戒、捨心迭共相依互為利益,以彼持戒能益捨心, 捨心亦能利益持戒。以是義故,次持戒後說成就捨心。

「又離持戒故生惡道中,捨心不能受於果報,如相應果則不能得具足現前;而持戒人生善道中,捨心則能受於果報,如相應果具足現前。以是義故,持戒於捨能作利益,捨心亦能利益持戒,以持戒人生善道處,無資生故,則為貧窮苦惱所逼。雖生善道即名惡道,成就捨心生善道處,於作自利及他利因,是故施能利益持戒。

「又以修行次第義故。此明何義?菩薩為欲利益眾生修行義故,如 是次第欲自取勘等口言功德先住持戒,次後依於不損害心起大慈悲 心,為他作利益法施資生施,如彼眾生可化攝取。

「又施等法能莊嚴戒故。此明何義?菩薩摩訶薩以施等法莊嚴持戒故,能成就種種勝果,如如來《娑伽羅龍王所問經》中說:『龍王!菩薩摩訶薩離殺生故,能起布施,則得成就大富資生不可破壞得長壽命,行菩薩行過諸世間所惱惡事,如是等。龍王!十善業道

亦復如是,布施莊嚴十善業道,成就大利益;持戒莊嚴十善業道, 成就一切佛法願;忍辱莊嚴十善業道,成就三十二相八十種好佛妙 音聲;精進莊嚴十善業道,成就佛法降伏一切諸魔怨敵;思惟莊嚴 十善業道,成就聞慧思慧修慧堅固清淨;般若莊嚴十善業道,成就 離諸邪見;慈心莊嚴十善業道,成就不害一切眾生心;悲心莊嚴十 善業道,成就不捨一切眾生心;喜心莊嚴十善業道,成就修行佛法 不怯弱心;捨心莊嚴十善業道,成就遠離愛心憎心,四攝莊嚴十善 業道,成就教化一切眾生心。』」

問曰:「捨義云何?」

答曰:「對治貪著五陰及以資生,起慈悲心為攝受彼利益他行,不 著因果等法,住持修行名為捨義。」

問曰:「應說捨成就義。云何菩薩捨成就?」

答曰:「菩薩遠離自取樂行,名捨成就。此義云何?又外道人求自取樂行於布施,彼外道人為自身捨,雖廣行施而愛境界心之所纏故,果報微薄。又聲聞、辟支佛人雖不求世間樂果報事,而心畢竟取於涅槃。捨利眾生但取涅槃樂,是故施等業道功德,雖少為他而畢竟自為,畢竟專念成就自身利益果報。又菩薩摩訶薩出過一切世間,大士為利益他發起堅固大力之心,起大悲柔軟所施最勝畢竟成就。

「又成就捨者,有六種因。何等為六?一者、捨自身樂;二者、觀無眾生;三者、求無量佛法;四者、攝取無量世住;五者、修集無量種種善根;六者、不斷三寶以能成就無量果報,是名菩薩捨成就義應知。又為他利益一味心故。此明何義?世間眾生多為自身棄捨利益一切眾生,為求自樂為現受報為未來果施與他物。若諸菩薩摩訶薩等,為利益他專心一味,見諸眾生貧無資財般若等法。以是義

故,不著因果依法施財施,於現在世及未來世能與眾生大利益事, 是故菩薩摩訶薩捨成就。

「又復以捨隨順義故。此明何義?布施等事隨順攝取眾生行故,則 能攝取一切眾生,作大利益事。雖為利益他事,而外道、聲聞辟支 佛等,棄捨利益一切眾生,唯為成就自身利益;菩薩摩訶薩依大慈 悲心起樂利益他眾生行,如菩薩所求如是成就。以是義故,名捨成 就。

「又以依於取佛菩提起心義故。此明何義?以菩薩摩訶薩為與一切 眾生樂故,自求佛菩提起於捨心,見諸眾生墮墜惡趣,我於現在及 未來世,令諸眾生離苦惱事。是故菩薩其心日夜轉轉為欲利益眾 生,名捨成就。

「又以能攝取種種果故。此明何義?以諸菩薩為欲利益一切眾生種種布施,於現在世及未來世,為欲攝取一切眾生取種種果,是名菩薩捨成就。如《無盡意修多羅》中說,求飲食者施與飲食,為命為樂為辯為色及以為力,如是等皆悉施與。

「又為遠離邪命自活求資生故。此明何義?以諸菩薩布施波羅蜜相 違之法貪求資生,邪命自活等皆悉遠離。如《無盡意修多羅》中 說,菩薩摩訶薩無顛倒邪命追求資生等布施。」

問曰:「應說清淨不清淨捨。云何清淨?云何不清淨?」

答曰:「菩薩摩訶薩依自心清淨布施清淨,如如來修多羅中說,有 四種清淨布施。何等為四?謂有布施從施主清淨非是受者,如是等 於彼四種清淨施中,所謂施主清淨非是受者,是名菩薩摩訶薩清淨 施。又從施者受者清淨,亦名菩薩清淨之施。何以故?以諸菩薩施 與他物不求果報,即能施與一切眾生。又求布施果報者,彼人於受 者邊求清淨,而菩薩離果報故,一切時自身心清淨,以心清淨故施 清淨。

「又以遠離忽然施等。此明何義?以如來修多羅中說有九種施:一者、植施;二者、畏懼施;三者、報恩施;四者、求恩施;五者、學父母施;六者、為生天施;七者、為名稱施;八者、為莊嚴心施;九者、眷屬法施。為修行功德為得上義施。植布施者,謂得植福田求多果報故。又植施者,謂近眷屬名植布施。畏懼施者,見一切物無常敗壞,寧用布施故。報恩施者,謂報恩相施,彼先施我、我應還施。求報恩施者,謂求後時報恩故。施學父母施者,謂著過去修行起如是心:『我父母精進常行布施,我亦如是行於布施。』故。為生天施者,謂求天中五欲境界故。為名稱施者,為令四方沙門婆羅門等知而施故。如是七種施。為智者所呵,以不清淨故。又聲聞、辟支佛人,離世間樂求涅槃樂,如是布施亦非清淨。又菩薩摩訶薩不著自樂,唯求諸佛菩提心施,於諸施中最勝清淨,是名菩薩施清淨。

「又以如實知有為行體故。此明何義?以諸凡夫取著虛妄戲論我相心顛倒故,唯求五欲樂境界事,以離慧眼以為愛等煩惱諸垢之所染污。捨不清淨。菩薩摩訶薩如實知見有為行體虛妄不實,是故遠離我見等相,及能遠離五怖畏故,無有內外可施之物不能捨者,以為求他利益所縛,及能遠離自求樂等垢污之法,以是義故,名捨清淨。

「又以空觀觀所起故。此明何義?以諸菩薩空觀等觀觀施等法,以 是義故名捨清淨。如《無盡意修多羅》中如來說言:『以觀空觀觀 起布施。』以是義故,施不可盡如是等。」

問曰:「應說布施差別之相?」

答曰:「略說則有一種布施,謂不貪心相應心施。

「復有二種:一、見受者;二、不見受者。不見受者者,如置物火中及恒河中。又見施主者,有施有布施。彼亦有二種:謂染、不染。染者謂家法餘食及婬女人莊嚴具施,是名染施。不染施者,謂施貧窮孤獨人等是不染施。

「復有二種施: 調法施、資生施。法施者, 調離供養恭敬等心,於 法中法想, 遠離愛心及顛倒心說修多羅等, 是名法施。

「復有三種施,即此二種加無畏施。無畏施者,作如是言:『汝莫怖畏,汝莫怖畏。』又無畏施者,見諸眾生種種怖畏施與無畏。此義云何?謂見他畏起,與現世及未來世無怖畏心,而口說言:『汝莫怖畏,汝莫怖畏。我為汝作如是如是方便,隨何等方便與汝畢竟無畏之處。』名無畏施。彼怖畏者,如貧窮人受於苦惱,此怖畏者亦復如是,以與無畏對治法故。

「復有四種施,即向三種,復有大施。言大施者,謂受持五戒,此是如來所說大施,以能攝取無量眾生故,成就無量眾生樂故。資生飲食用布施者,不能廣作利益眾生。受持五戒能作利益,以能盡形受持五戒,念念增長種種功德,以依止彼根本心故,諸功德聚乃至命根不斷絕住。

「復有四種施,此四種施略有二種:一者、不淨;二者、淨。不淨中有二種差別。何等為二?一者、怖畏施;二者、求報恩施。以何義故名為不淨?如世間田,以為荊棘惡草等覆,故名不淨,此亦如是,以怖畏故、求報恩故,名不淨施。淨中亦有二種差別。何等為二?一者、敬重心施;二者、慈悲心施。除此四種更有上上勝施,如偈言:

「『下求有資生, 下下怖畏施,

智者敬重施, 勝智慈悲施。』

「復有四種施。何等為四?一者、自利益施非他利益;二者、他利益施非自利益;三者、俱利益施;四者、俱無利益施。自利益施非他利益者,謂凡夫聖人伏離煩惱,或有非是伏離煩惱,或時施與諸佛如來,或時施與形像塔廟,是名自利益施非他利益。他利益施非自利益者,謂阿羅漢、阿那含等,除為現果施與眾生,是名他利益施非自利益。俱利益施者,謂施伏離煩惱凡夫,或未伏離煩惱凡夫,是名俱利益施。俱無利益施者,除為現果,謂阿羅漢、阿那含等為塔廟施,是名俱無利益施。

「又復略說,諸菩薩摩訶薩有四種施,悉能攝取一切善根。何等為四?一者、平等心施;二者、對治施;三者、迴向大菩提施;四者、依寂滅施。如是諸菩薩摩訶薩為滿足檀波羅蜜故,如是布施應知。」

問曰:「應說布施果。云何布施果?」

答曰:「略說布施,有一種果,所謂受用。

「復有二種果,所謂現在受果、未來受果。

「復有三種果,即此二種復加般若。

「復有四種果,何謂四種?一者、有果而無用;二者、有用而無果;三者、有果亦有用;四者、無果亦無用。有果而無用者,謂不至心施、不自手施、輕心布施,彼如是施,雖得無量種種果報而不能受用,如舍衛天主,雖得無量種種珍寶,而不能受用。有用而無果者,謂自不施,見他行施起隨喜心。以是義故,雖得受用而自無果,如天子物一切沙門婆羅門等,雖得衣食及以受用而自無果,又如轉輪聖王四兵,雖得衣食而不得果。有果亦有用者,謂至心施、

不輕心施,如樹提伽諸長者等。無果亦無用者,謂布施已因即滅盡,或為出世聖道障故,猶如遠離煩惱聖人。

「復有五種果,謂得命、色、力、樂、辯等,如如來修多羅中說, 因食得命是故施食即是施命,以是因緣後得長命。如是施色、施力、施樂、施辯才等,皆亦如是。

「復有五種勝果,所謂施與父、母、病人、法師、菩薩,得勝果報。父母恩養生長身命,是故施者得勝果報。又病人者,孤獨可愍。以是義故,起慈悲心施病人者得勝果報。又說法者,能生法身增長法身,示導善惡、平正非平正、顛倒非顛倒,是故施者得勝果報。又諸菩薩等悉能攝取利益眾生故,以快心故、以無因緣而能發起慈悲心故、以攝取三寶不斷絕因故,以是義故,施菩薩者得勝果報。

「復有五種果,即現身得。何等為五?一者、入慈三昧;二者、入無諍三昧;三者、入滅盡定;四者、見道;五者、阿羅漢果。若布施者,即得果報。入大慈定者,能發心與無量眾生安隱之樂,以與無量眾生樂故名為慈心,以是慈心熏修自體,是故初起慈心三昧即布施者,得現果報。又入無諍三昧者,悉能防護一切眾生諸煩惱心,以廣攝取利益眾生熏修自體,是故初起無諍三昧即布施者,得現果報。又入滅盡定者,則能攝取無量功德,以取無量功德熏修自體,以此三昧似於涅槃,是故初起滅盡三昧即布施者,得現果報。又見道者離見道煩惱,以聖道力熏修自體,以是義故,初起見道即布施者,得現果報。又菩薩摩訶薩布施果者,是故初起阿羅漢果即布施者,得現果報。又菩薩摩訶薩布施果者,如《無盡意修多羅》中及餘一切修多羅中廣說應知。而諸菩薩摩訶薩等,修行布施勝餘人施,離自取樂為欲利益他眾生故而行布施。又復略說,菩薩求於二種法故而行布施:一者、求於大富資生故;二者、求得成就波羅蜜故。

「又復菩薩起如是心:『我若無有多資生者,雖有施心而無財物可以布施。』是故起心為欲成就資生大富施與眾生,依此施故怨親平等攝取利益。是故菩薩見依布施故,得成就無量福德:一者、能攝取怨;二者、恒常給濟一切眾生衣食等物;三者、心不怯弱;四者、餘親不欺;五者、常為眾人敬信尊重;六者、一切眷屬信受其語;七者、入大眾時心無怖畏;八者、一切怨敵不能傷害;九者、親屬歡喜;十者、現果資生常有不空;十一者、常為他求;十二者、所作已辦;十三者、情所愛敬常自圍遶;十四者、所不愛敬皆悉遠離;十五者、所有成就世間出世間利益勝事,常為一切親屬所慶;十六者、若無利益一切諸親則懷憂惱;十七者、護一切惡;十八者、自令安住諸善法中;十九者、見他神通心不欣尚;二十者、恒常讚歎一切功德;二十一者、覆藏諸過;二十二者、棄捨一切非丈夫相;二十三者、成就一切大丈夫相;二十四者、無有貧窮下賤乞人看施主眼;二十五者、一切求心稱事滿足。

「是故菩薩摩訶薩,深見布施有如是等無量功德,為欲利益一切眾生,自能成辦如是力故,信憙布施,以依信憙行布施故,則能滿足檀波羅蜜。」

問曰:「為從勝心成就清淨布施果報?從勝福田成就清淨布施果報?」

答曰:「有人言:從勝心故成就清淨布施果報。何以故?現見施事是一而果報差別,猶如種子。此義云何?猶如種子,地等是一,而依種子見有勝果。如是施物是一,而依勝心乃至施畜生等,以心力故得人天果,轉輪聖王、聲聞、辟支佛、佛菩提果。以是義故,依於勝心得勝果報,是故得知勝心為重。此復何義?若施事是重,依施事故成就清淨施果報者,離重施事以慈悲心施與畜生、施與福田,如布施佛不應成就清淨施果。又若離快勝尊重心等布施如來,

應得成就清淨施果而實不成。以是義故,成就清淨布施果報,心為 勝因,而施事福田能生勝心。依此義故,如來經中讚歎福田。

「復有人言:依勝福田、依重施事成清淨果。何以故?以聞布施不知福田得勝果報。此明何義?不識佛等功德福田、布施佛等得勝果報,如有獼猴施如來蜜,及婆私咤加尸迦等。又如女人愛念心故,以諸幡蓋及華鬘等本心實欲供養兒塔,而實供養辟支佛塔謂是兒塔,從辟支佛得無量福,不從本心兒邊得福,如是等。以是義故,從勝福田及以重事得勝果報,不從心得,故知福田施事為重。

「又有人言:不知福田無福田事,不得成就清淨施果。如有一人施 尼乾子生羅漢想,而不成就清淨果報。

「又有人言:心以福田及施事等三種和合。此明何義?若布施者從 所尊重起布施心,知福田等無量功德,值遇諸佛如來福田,或時值 遇如來弟子,從尊重心起布施心,所可施物是難捨事能捨布施,三 種和合方得成就清淨果報而心為重。以是義故,此三種中唯心一種 為重為勝,是能捨主能施主者。」

問:「捨主、施主有何差別?」

答曰:「有乞求者,持他物施,是能施主;持自物施,是能捨主。 又有人來乞,持自物施是能施主;若人發心求貴重物,而口不言, 知心即施,是能捨主。又布施物時慳心數數中間隔起,是能施主; 若無慳心數數起者,是能捨主。又雖施他物,以慳心故自求果報, 是能施主;若施他物,不以慳心專求自果,是能捨主。又離喜等心 而行布施,是能施主;共歡喜心於三時中不悔心施,是能捨主。又 若求未來勝果報者,是能施主;離世間報求涅槃果,是能捨主。又 若施求於現在未來及涅槃果,是能施主;若發心求大菩提果,唯大 悲心施與眾生,是能捨主。 「成就善知迴向方便者。」

問曰:「何故說戒、施後次說善知迴向方便?」

答曰:「為欲示現異道功德故。此義云何?外道人等求自樂故,修 戒施等迴向三有。又聲聞人、辟支佛等,亦自為身求涅槃樂,修戒 施等迴向涅槃。諸菩薩摩訶薩為利益他求大涅槃,以慈悲心一味等 心與眾生樂,修戒施等迴向無上大菩提果,以戒施等同彼外道聲聞 辟支佛,是故如來示現迴向勝道功德,說戒施後次說善知迴向方 便。

「又修戒施等貪著世間樂果報心難可防護,是故如來說施戒後,次 說善知迴向方便。此明何義?以戒施等非三昧行,唯取欲界天人之 中淨妙色等境界果報,而彼淨妙色等境界,雖作心護,貪等煩惱不 可得離。何以故?以於過去無始世來習貪愛等染著境界,以心取彼 色等境界難防護故。而諸菩薩彼時修行地方便法,即於彼時雖復未 離貪等煩惱而修戒施,貪等煩惱不能染心。

「又為斷疑,是故如來說戒施後,次說善知迴向方便。此示現何義?世間有人,疑於菩薩不離煩惱修戒施等,以利根故觀有為法, 一切皆悉苦空無常,修戒施時貪等煩惱為染菩薩、不染菩薩?為斷 彼疑。菩薩爾時,為欲利益一切眾生,捨自利益乃至不求轉輪王處 樂果報事,唯為一切眾生樂故求佛菩提,所有善根迴向涅槃。以是 義故,菩薩雖復未離世間,一切世間所有過患不染菩薩。

「又依清淨戒迴向清淨故。此明何義?以依清淨持戒之力,是故能 捨

「以捨力故,諸所求法皆悉成就。是故如來說戒施後,次說迴向方便。是故如來修多羅中說,持戒人所願所作皆悉成就。何以故?戒清淨故。」

彌勒菩薩所問經論卷第六

彌勒菩薩所問經論卷第七

後魏天竺三藏菩提流支譯

問曰:「應說迴向義及說方便義。云何迴向義?云何方便義?」

答曰:「若迴餘處善根功德向佛菩提,是名迴向。又依佛菩提起修 行心,無量種門於一切時於一切處集諸善根,為欲證得一切種智, 依於世諦境界般若,迴向方便普令轉來故。此明何義?以諸菩薩依 於世諦境界般若,知因似果、修有量因,深心成就菩薩不共道功德 等,增長勝法置於無量果報之中,是故名為迴向方便。

「又以同勝迴向故。此明何義?以略說菩薩摩訶薩有二種迴向。何 等為二?一者、同迴向;二者、勝迴向。同迴向者,一切善根皆悉 迴向薩婆若智。勝迴向者,如《無盡意修多羅》布施果中說:『須 食與食,具足命辯色力樂故;須飲與飲,離渴愛故。如是施衣得 色、施乘得樂、施燈得眼、施音樂者得淨天耳,如是乃至施髓腦者 得金剛身堅固不壞。』如是等。又同迴向者,為與一切眾生樂故。 勝迴向者,未生信心者令生信心故,若有破戒者令得持戒故,若無 聞慧者令得聞慧故,若有懈怠者令得精進故,若有憙忘者令得憶持 故,若心散亂者令得禪定故,若無智慧者令得智慧故,若有慳惜者 令成就捨故,如是等。又同迴向者,為滿六波羅蜜故。勝迴向者調 捨外事故,為令一切眾生具足大富資生故,捨手脚等一切肢節,及 以諸根為令一切眾生具足諸根手足等故,如是等迴向一切修多羅中 廣說,應知。

「又為欲清淨諸佛國土,是故迴向。此義云何?菩薩為欲清淨四種 義故,檀等諸白法迴向佛菩提。何謂四種?一者、為欲清淨諸佛國 土;二者、為欲清淨菩提之心;三者、為欲教化淳熟清淨眾生之 心;四者、為欲清淨一切佛法。而菩薩不為得世間位故迴向,不為 求於自身樂故迴向,不為取聲聞辟支佛地故迴向。又施等布施遠離盡因迴向,以諸菩薩取一切種智因,是故菩薩善知迴向方便。

「又菩薩有四種事,施等功德盡。何等為四?一者、不迴向阿耨多羅三藐三菩提;二者、求於世間人天生處;三者、無迴向方便;四者、親近惡知識,如是菩薩一切施等善根盡滅。若菩薩行布施等,若三種法常現前者,菩薩爾時施等功德遠離盡因能成一切種智。何等為三?一者、正遍知菩提心;二者、憐愍眾生;三者、不違如來言教。

「又以攝受方便故。此明何義?以諸菩薩乃至攝取微少善根能成就 廣果,以即彼布施等世間眾生取天人果報,即彼布施等諸菩薩摩訶 薩取佛菩提,是故菩薩成就迴向方便,如如來方便修多羅中說: 『又,善男子!菩薩摩訶薩以方便智,乃至捨一口食施與一人,則 能遍滿一切眾生。何以故?以菩薩有方便智慧故,以一口食乃至施 與畜生,而心常共一切眾生,以彼善根皆願迴向一切種智。菩薩布 施為二種事,是故施與一切眾生:一者、求一切智地;二者、迴向 大菩提。復次,善男子!菩薩摩訶薩以方便力施布施時,六波羅蜜 皆悉滿足。何以故?以諸菩薩摩訶薩見乞索人時,攝伏慳嫉心增長 大捨心故,即得成就檀波羅蜜。又諸菩薩以自身持戒布施持戒人, 所有破戒人令成就持戒,是名菩薩摩訶薩尸波羅蜜。

「『又諸菩薩慈心、不瞋心、定心布施,是名菩薩摩訶薩羼提波羅蜜。又諸菩薩布施佉陀尼、蒲闍尼等種種飲食,身口意業去來進止,是名菩薩摩訶薩毘離耶波羅蜜。又諸菩薩施布施時專心一念歡喜,不散亂、不求餘事,是名菩薩摩訶薩禪波羅蜜。又諸菩薩施布施時,觀察法相,誰是能捨、誰是能受、誰受果報?是菩薩如是觀察不見一法,以不見一法誰是能捨、誰是能受、誰能受果?是名菩薩摩訶薩般若波羅蜜。』如是等方便修多羅中所明迴向方便應知。」

問曰:「應說淨不淨迴向,如布施中有淨不淨,此迴向中亦應如是有淨不淨。云何淨?云何不淨?」

答曰:「因修行果如餘一切修多羅中廣說應知。

「成就慈心者。」

問曰:「何故如來說善知迴向方便後,次說成就慈心?」

答曰:「持戒布施是散亂心,修道功德決定感於欲界果報,菩薩以迴向方便攝取決定欲界果報,轉求大菩提示現彼果不定、示現善能修習菩薩道故。又持戒布施是三昧心修道功德,決定感於禪地果報,菩薩以迴向方便攝取決定禪地果報,轉求大菩提,示現彼果不定、示現善能修習菩薩道故,是故如來說迴向方便,復次說成就慈心。此明何義?以諸凡夫不如實知真實法界,無始世來修習無智,以無智故不能遠離我我所法,以其妄執我我所故,為色境界,愛心所纏,是故心常求世間果作極惡行,自然成就世間果報,修行戒施決定成就同界果報。而菩薩心見諸世間所有一切種種過患,見於涅槃安樂利益,善能覺知真實法界,善知因緣有為諸行。其心唯為無上菩提修戒施等,為欲救度世間所有墮墜嶮難放逸眾生持戒布施,雖不取彼世間果報而為眾生修一切行,不為自身取於果報,增長所修大功德力,心能攝受迴向方便,隨順成就求處果報。」

問曰:「應說四無量。云何菩薩成就四無量?云何行?云何世辯? 云何體?云何相?云何地差別?依止何處,觀何境界,觀何法?云 何相應?云何得?云何成就義?」

答曰:「云何菩薩成就四無量者,以其不同外道等故。此明何義? 諸外道輩雖復修行四無量行,以為愛心之所潤著,是故成就色界果報。又聲聞人、辟支佛等,一切善根皆為自身,其心常為自身樂故 取於涅槃,畏煩惱熱為伏諸結,修行無量非為眾生。若諸菩薩摩訶 薩等,其心常為一切眾生,修行諸行皆悉轉施一切眾生,以慈悲心 起戒施等,為欲利益一切眾生,雖為世間極惡過患之所逼惱,以為 不捨諸眾生故,為滅一一眾生苦惱,畢竟寂滅一切苦惱,觀察無量 諸眾生身,一一身有無量種種苦惱差別。復如實知一一方便,救彼 無量苦惱眾生,以無量時雖見涅槃界觀無量眾生,能得成就無量佛 法。以是義故,名為菩薩成就無量。

「又以遍取果故。此明何義?以諸菩薩摩訶薩等修行無量無邊行故,慈等無量,是故菩薩成就無量。如《無盡意修多羅》中聖者無盡意告舍利弗言:『大德舍利弗!菩薩修慈亦不可盡。何以故?菩薩之慈無量無邊,是修慈者無有限齊等眾生界,菩薩修慈發心普覆。舍利弗!譬如虛空無不普覆,是菩薩慈亦復如是,一切眾生無不普覆。舍利弗!如眾生界無量無邊不可窮盡,菩薩修慈亦復如是,無量無邊不可窮盡,虛空無盡故眾生界無盡,眾生無盡故菩薩修慈亦不可盡。』如是等。

「又為安隱他與功德故,起心修行。此明何義?菩薩摩訶薩修四無量不為自身,為一切眾生,為畢竟安隱一切眾生與功德心,是故成就。如《無盡意修多羅》中無盡意菩薩告舍利弗言:『大德舍利弗!是慈能自擁護己身,是慈亦能利益他人,是慈無諍,是慈能斷一切瞋恚嫌恨。』如是等。

「云何行者?謂有所厭。此明何義?依厭所得四無量者,彼初禪地 所有無量厭欲界得,如是乃至第四禪中所有無量厭三禪得,而後時 作方便後時現前。」

問曰:「何等名為無量故修行方便?」

答曰:「慈依親起。此明何義?菩薩若欲修四無量,彼時心於一切 眾生三種分別:一者、親分;二者、怨分;三者、非親非怨分。於 親分中復為三分,作三分已,彼三分中於上親所起與上親安隱樂 心,所謂父母及餘尊重諸師僧等。以無始來習極惡,心難可平等, 是故如是分別報恩,於親分中不能平等轉轉修習。

「又乃平等。若心如彼增上親中,若怨分中心住平等,如與父母樂心無異。爾時名為成就慈心,悲喜捨心亦復如是應知。而捨無量從於非怨非親分中起乃成就。

「又諸菩薩摩訶薩等,不離煩惱修集禪地方便無量,若斷煩惱攝取 初禪無量,如是四無量次第成就應知。

「又四無量說有三種:一者、眾生觀;二者、法觀;三者、無觀。 初發菩提心菩薩未知眾生相,同於外道、聲聞辟支佛觀無量,是名 眾生觀無量。

「又諸菩薩即彼眾生觀無量,次第漸漸增長勝上,如實知眾生相修菩薩行,未知一切有為法相,依假名眾生有為諸行起眾生相戲論, 即取此有為行以為眾生,名為法觀無量。

「又諸菩薩能如實知有為行相,得無生法忍,從慈心後次生平等觀般若,說名慈心,名為無觀無量,如共慈心相應覺分。此明何義?如慈心後次生擇法覺分而說名慈,如是慈無量後次得平等觀般若,說名慈無量,是名無觀無量。

「又諸菩薩摩訶薩等,為與他樂,從慈心故起一切行。此明何義? 以諸菩薩摩訶薩等所起諸行,一切皆從慈心而生,以為利益他眾生故、以為安隱他眾生故。以得無生法忍菩薩摩訶薩般若從慈心起, 與一切眾生安隱之樂,似於慈心。說名為慈。

「又世諦境界法,第一義諦境界法,迭共相依增長有力,能廣修行成就無觀,說名善清淨、說名慈心。云何名為世諦境界為般若因?

以諸菩薩見諸法體,依慈悲心觀察眾生,所作之事不墮聲聞辟支佛地。以是義故,不捨眾生所作之事,是則名為世諦境界慈悲等法為般若因。

「云何名為第一義諦境界?般若為世諦境界慈悲等因。以諸菩薩欲 清淨世諦慈悲等法,以知依止眾生行相起諸煩惱,觀察煩惱深眾生 行相,以如實知煩惱從眾生行相起。是故菩薩遠離慈等不清淨因一 切煩惱,是名般若能為世諦境界法因。諸菩薩等如是修行般若方便 廣修諸行,是故成就無生法忍,彼時無觀不捨眾生所作事因,清淨 究竟慈心名字慈心,說名慈心,是名無觀。

「云何世辯者?釋彼無量名,以能觀察無邊眾生,故名無量。

「云何體者?慈悲心體者,不瞋善根是。何以故?以對治瞋法故。 又對治可瞋處是名為慈,對治不可瞋處是名為悲。又對治起捨眾生 心是名為慈,對治打眾生心是名為悲。是以求功德故能生無量,非 求過故能生無量。何以故?以諸菩薩乃至斷善根人,若求功德見淨 業果,乃至阿羅漢邊若覓過失,見惡業果。何以故?以見羅漢現身 中受不善業果,不見過去餘業不盡,謂阿羅漢今身造惡。以是義 故,於阿羅漢不能發起慈悲無量。喜心體者,謂喜根是;捨心體者 不貪善根是。」

問曰:「若如是者,則非貪欲及害根等對治之法?」

答曰:「不然。以不瞋善根相應法故,故如是說。」

問曰:「若捨心能對治貪法,不淨觀亦對治貪法?」

答曰:「汝知何等貪法捨能對治?何等貪法不淨對治?」

問曰:「不知。」

答曰:「汝聽!色貪,不淨能斷;婬貪,捨心能斷。此四無量共心 展轉五陰為體。

「云何相者?與眾生樂相安隱眾生,是名慈相。拔眾生苦相滅相寂 靜相憐愍眾生,是名悲相。離不樂心相嫉妬對治法,是名喜相。捨 愛不愛相利益一切眾生事因相違之法,自然縱任,是名捨相。

「云何地差別者?除喜無量,餘三無量在六地中應知。何等為六? 謂未來禪及中間禪、四根本禪是名六地。初禪,二禪有喜無量,餘 三無量遍四禪中,以喜無量喜根為體故。

「依止何處者?依止欲界,以欲界中現起四無量,非是餘處。何以故?以欲界眾生多苦惱故,見眾生苦起與樂心,見眾生苦起拔苦心,以色無色界無苦惱故。又是惱害等對治法故。此明何義?以四無量對治害等法故。以是義故,經中說言:『修行慈心下中上成就離事心,修行甚心下中上成就離真心,修行喜心下中上成就離不樂心,修行捨心下中上成就離貪欲害等心,色無色界貪欲害等皆悉無有。』以是義故,在欲界中非色無色,雖在欲界唯三天下,非欝單越。

「觀何境界者?謂慈觀樂、悲觀拔苦、喜觀喜境界、捨觀捨境界。

「觀何法者? 調觀欲界眾生五陰之身,或觀二陰。又若共心同類彼 則五陰,不共心同類彼則二陰,或觀無心眾生,或觀一陰眾生,或 觀二陰眾生。」

問曰:「有經中說,慈悲喜捨普遍一方虛空法界,如是乃至遍覆十方世界,此中唯說觀於眾生。其義云何?」

答曰:「遍十方者,謂觀一切依世界住所有眾生,故言遍覆十方世界,非謂遍覆彼器世間。言普遍者,示現依彼器世界住所有眾生。

「又初禪地無量觀欲界眾生,二禪地無量觀欲界及初禪,如是乃至 四禪地無量觀欲界乃至第三禪。又初禪地無量觀欲界及初禪,如是 乃至四禪地無量觀欲界乃至第四禪。又慈觀欲界乃至三禪。何以 故?以慈心觀樂境界故。又樂根從欲界乃至第三禪故,悲觀欲界至 初禪。何以故?以悲心觀苦境界故,以欲界眾生多苦惱故。又苦根 從欲界至初禪故,喜觀欲界乃至第二禪。何以故?以彼喜心勇悅相 故。又喜根從欲界乃至第二禪故,捨觀欲界乃至四禪。何以故?以 捨捨相觀故,又捨根從欲界乃至第四禪故。

「又有人言:一切無量唯觀欲界眾生。

「云何相應者?初禪二禪地喜根捨根相應,第三禪地樂根捨根相應,未來禪中間禪第四禪地捨根相應。

「云何得者?若生第三第四禪者,得三無量除喜無量。何以故?三禪已上無喜根故。又欲界生離煩惱者,及在初禪二禪生者得四無量,如如來修多羅中說:『慈無量者至遍淨處以為邊畔,悲無量者至虛空處以為邊畔,喜無量者上至識處以為邊畔,捨無量者無所有處以為邊畔。何以故?以根本初禪所攝故。』此明何義?以無量從無邊虛空處以為邊畔,故如是說。

「又有人言:彼處聖道以無量名說。何以故?以可化眾生有如是 根,聞無量名來入聖道故。

「復有人言:依彼對治覺分菩提分說。此明何義?以第三禪對治覺分,即彼覺分以慈名說,如是乃至無所有處依彼對治以捨名說。

「復有人言:彼相似法。此明何義?以慈觀樂而樂受,乃至第三禪中以悲觀苦,而無邊虛空處共色相違,以喜觀無樂而無邊識處識喜住故,以捨觀捨而無所有處,捨無所捨說名為捨。復有餘修多羅中說:『大德舍利弗!初發心菩薩以四無量觀於眾生,名眾生觀。菩

薩摩訶薩行菩薩行,觀己行故名為法觀。菩薩摩訶薩得甚深無生法 忍,名為無觀。』」

問曰:「四無量者觀於眾生。云何復言觀法、觀無?」

答曰:「為他利益一切行等,以慈相似法故。此明何義?菩薩摩訶 薩為諸眾生修一切行,皆以般若為本,是故般若以慈名說,以彼慈 能樂他相故,如是菩薩捨自身樂,般若波羅蜜與他樂相,是故般若 以慈名說,是故觀法觀無皆是慈悲般若。

「復有人言:無觀慈心,以慈名說。此明何義?以諸菩薩觀察眾生,復為自身推求遠離煩惱方便觀有為行,得甚深無量心時,即得畢竟般若力,作是思惟:『此諸眾生無智所覆不能如實知見法界,我當令彼諸眾生等,漸漸次第得入正道。』

「復有餘修多羅中,佛告諸比丘過去七年修行慈心,世界成壞經由七返不來生此,乃至無量百千萬劫作轉輪王等。」

問曰:「若四無量所得果報非欲界者,云何如來經中說言:『修行無量所得果報,乃至無量百千萬劫作轉輪王?』」

答曰:「彼經中依三地無量作是說。此義云何?有欲界地果報無量 作轉輪王,有初禪地果報無量作梵天王,有二禪地果報無量生少光 天。又欲界起心三摩跋提,所有果報作帝釋王及轉輪王,根本地禪 所有果報,作梵天王生少光天。

「復有餘修多羅中佛告比丘: 『過去世時有外道師名善眼世尊。彼 外道師善眼世尊獲得神通離欲界煩惱。諸比丘!彼外道師善眼世尊 多有無量聲聞弟子,有無量百、有無量千、有無量萬、有無量百千 萬。諸比丘!彼外道師善眼世尊所有聲聞,具足持戒,彼外道人修 四梵行離欲界煩惱,修四梵行生梵世間。諸比丘!彼外道師善眼世 尊所有弟子,不能具足修四梵行,彼弟子中或生他化自在天者,乃至人中如是等。爾時,外道師善眼世尊生如是心:「我今不是,云何乃與弟子一處去一處生?」作是思惟:「我依慈心修第二禪生少光天。」諸比丘!彼時外道師善眼世尊修上大慈入第二禪生第二禪。』如是等。」

問曰:「若諸菩薩摩訶薩等為利益他,於諸眾生起平等心,何故自生勝心慈心,修第二禪生少光天,而不為弟子說生少光天法?又復有難,彼外道師善眼世尊有所說法勝於佛法。何以故?以彼皆生上善道故,而如來聲聞亦有入惡道者。」

答曰:「此無過失。何以故?菩薩觀機而說法故。此明何義?以彼外道婆羅門等長夜思惟,初梵天處是究竟處,隨順樂心而生彼處,不能修行生第二禪四無量行。以是義故,菩薩善知彼弟子心故,不為說生第二禪四無量行。又以無力故。此明何義?有人說言:除佛出世,無有外道能具修行二禪無量生第二禪,唯除大力諸菩薩等。又言外道法勝佛法者,此義不然。何以故?以外道取世間果故。

「又以時節故。此明何義?有如是時,多有眾生生善道處,何況復 有無量眾生修行無量!

「又言如來弟子入惡道者,非如來過。

「復有餘修多羅中說,有三種行:梵行、天行、聖行。梵行者,謂 四無量。天行者,所謂四禪。聖行者,謂三十七菩提分法。

「以何義故說四無量名為梵行?」

答曰:「以四無量梵天因故,又以修行者身中可得故,又以對治非 梵行故。」

問曰:「何故色界諸善根中,唯說無量以為福事?」

答曰:「以為起他利益行故。此明何義?世人多於他利益中生功德相,餘利益中不多生故。」

問曰:「復有餘修多羅中說,有四種人能生梵功德。何等為四?一者、器世間地未有塔處於中立塔;二者、種植園林施四方僧;三者、和合先破壞僧;四者、能生四無量心。」問曰:「若修四無量得梵天果,得言成就梵天果者;立塔等三得梵天果,此義云何?」

答曰:「依梵行說是故無過。此明何義?非立塔等成就梵果。若有人依梵如來立舍利塔,彼人能生梵行功德。又依修梵行者施與園林,如是施者成就梵福。又依聖道修習梵行和合破僧,得梵天果。又以彼相似故。此明何義?立塔等三成就梵天果報,功德非一向同四無量果,而彼少分相似義故,如人成就四無量心,彼人則為攝受眾生成就無量利益功德。此亦如是,若人於彼器世間中,未有塔處立舍利塔,施僧園林、和合破僧,彼能成就無量福德,以是故言修四無量立塔等三有相似義。」

問曰:「梵行功德其量幾何?」

答曰:「有人說言:隨何等業得轉輪王,王四天下勢力自在,梵行功德其量如是。復有人言:隨何等業得帝釋王勢力自在,梵行功德其量如是。復有人言:隨何等業得作魔王,於欲界中勢力自在,梵行功德其量如是。復有人言:隨何等業得生梵天,梵行功德其量如是。復有人言:梵天請佛轉于法輪隨所得福,梵行功德其量如是。1

問曰:「復有其餘修多羅中,如來說言:『若有人能成就慈心,彼 人功德火不能燒,水不能漂刀不能割,毒不能害命不中夭。』為何 義故作如是說?」 答曰:「諸佛如來所有境界不可思議,一切禪定不可思議,一切諸 業不可思議,如是等。復有人言:若人能與無量眾生無量安隱,以 是故說彼外因緣不能傷害。

「又彼人憶念色界四大。此明何義?以彼修習慈心之人,入慈心故 依於色界成就色界四大之身。以是義故,外諸因緣不能傷害。」

問曰:「以何義故,此修多羅中唯說修行慈心悲心得多功德,不言 喜捨?」

答曰:「以利益他多修行故。此明何義?修慈悲心與樂拔苦,依慈悲故起心修行,捨布施等得無量福,而喜捨等不能如是。此義云何?以彼喜心見他眾生自修善業自得受樂,彼人生喜,以是故喜。捨亦如是,以他眾生自心分別瞋心愛心及無害心,故名為捨。以是義故,喜捨福少、慈悲福多,以慈悲心成就與他無量利樂,非是喜心捨心成就,以對治瞋名為慈心,不瞋善根以為體故,以最勝義對治於瞋。何以故?以瞋心故捨諸眾生,與一切眾生利益事相違。是故菩薩為欲利益一切眾生,對不利益眾生事,因此經中說修行對治慈悲心等。

「又發菩提心修諸善行,皆慈悲心以為根本。此明何義?即此修多羅中說不退轉心,成就發菩提心因,彼發菩提心初始欲生,依慈悲心以為根本,則能修集無量功德;非喜捨等。以是義故,此修多羅中唯說慈悲多生功德,不言喜捨。是故《十地修多羅》中說:『彼菩薩發菩提心,是心以大悲為本。』如是等以畢竟成就大慈大悲身口意業故。

「又是三昧身口意業依慈悲心起,與樂相應說名慈心,以見世間因中說果。譬如世間木作畫作因中說果,成就無害身口意業,以悲對害心,不生他惱亂身口意業故。」◎

彌勒菩薩所問經論卷第七

後魏天竺三藏菩提流支譯

◎「成就善知方便。」

問曰:「以何義故,說無量後次說成就善知方便?」

答曰:「為欲示現以方便力攝取所修四無量行,隨順自心受果報 故,如說四大隨順。此明何義?略說菩薩二種善巧利益方便,以外 道等一切無有第一義諦巧方便故,修行無量為愛所潤成色界果。又 諸聲聞辟支佛人,為取涅槃心取以為究竟,善根棄捨利益一切眾 生,棄捨世諦所作諸業,其心專為利益自身,不能如實修四無量, 不能究竟斷諸煩惱,唯能折伏一切煩惱。若諸菩薩摩訶薩等,能如 **曾知二種之法有為無為,觀察眾生不捨有為,雖如實知寂靜無為,** 以為成就一切佛法不墮有為,以諸所修為利益他,以如實知自相同 相,以不能得隨心自在定得色界清淨果報;四無量行,以彼愛心所 不能潤,而隨順心成就果報,如隨順四大。此明何義?如四大相非 是成就第一義諦,如禪定人隨順心力而能捨離四大自相;此亦如 是,雖復成就有為法相,以諸菩薩清淨持戒諸功德眾,修四無量隨 順心力成就果報,而不隨順四無量心。以是義故,《聖者思益梵天 所問修多羅》中,如來說言: 『若諸菩薩摩訶薩等,成就四法修行 四禪生於欲界。何等四法?一者、得心自在;二者、具足諸善根 力;三者、觀察一切眾生;四者、修行方便般若。』是故示現方便 攝取無量修行隨心受果,說無量後次說方便。」

問曰:「應說方便義。云何方便義?」

答曰:「次說方便義,有二種:一者、求異義;二者、不捨二義,心修諸行智慧觀察名為方便。此明何義?求異義者,諸菩薩等非為

現前證聖道果,亦非為厭世間苦惱捨於世間心,為利益一切眾生, 及為自身取大菩提方便、為教眾生菩提方便,及欲清淨大悲等行取 菩提法,出過聲聞辟支佛等所證之位、道功德等所對治法,菩薩所 證聖道現前,名求異義。

「不捨二義者,謂菩薩心不捨世諦、第一義諦故。此明何義?以諸菩薩實見一切有為諸法皆悉無常,觀察眾生不捨一切有為諸法,不離有為法、不捨無為法,如是菩薩摩訶薩般若行不退轉因,說名方便。如聖者文殊師利於經中說: 『天子!菩薩摩訶薩般若智,知菩薩摩訶薩非行有為智、不墮無為智。如是菩薩摩訶薩,名為無畏菩薩。復次,天子!若諸菩薩觀察眾生不捨有為行,觀察諸佛法不墮無為行,如是菩薩摩訶薩,名為無畏菩薩。』如是等。又隨順心所求之義,稱心所求能成就行,名為方便。又以畢竟具足智故,名為方便。」

問曰:「善知世諦者,如是等句說何等義?」

答曰:「善知世諦者,善知自相故。善知第一義諦者,善知同相故。善知二義者,善知自相同相故。」

問曰:「但說善知世諦、善知第一義諦便足,何故復說善知二義?」

答曰:「為欲示現菩薩勝義知方便故,是故復說善知二義。此明何義?外道遠離如實般若智,唯有世智無出世智;聲聞辟支佛捨世間智,但有涅槃智無世間智;菩薩摩訶薩為欲利益一切眾生求妙法故,於世諦中及第一義諦中修行方便智。如來為欲示現菩薩勝方便智,是故復說善知二義,成就般若波羅蜜。」

問曰:「何故如來說方便後,次說成就般若波羅蜜?」

答曰:「示現方便攝取般若故,又以示現諸菩薩等所證位義,是故如來說方便後,次說成就般若波羅蜜。此明何義?以觀能成菩提分 法清淨善根,菩薩欲見真如法體,而未能見真如實智,於先觀察出 過聲聞辟支佛位所對治法,觀察大慈悲等,成就根本大慈悲等,然 後得見彼真如法。以是義故,見真如法不墮聲聞辟支佛地,是故如 來示現修行次第義故,先說方便次說成就般若波羅蜜。」

問曰:「成就般若波羅蜜者,應說般若義,如實知見名為般若,能觀所觀境界名為般若。如實知深淺數量名為般若,是義應說。」

答曰:「到彼岸故名波羅蜜義。又諸佛如來已到彼岸名波羅蜜,初 地菩薩以其畢竟到彼岸故名波羅蜜,以諸菩薩畢竟得彼岸行名波羅 蜜。是故如來經中說言:『隨順彼行名波羅蜜,以彼處未決定,彼 岸義故。』是故如來於《無盡意所問經》中說:『滿足行菩薩行名 波羅蜜義,快深智滿足名波羅蜜義。』如是等。」

問曰:「應說般若波羅蜜義。云何般若波羅蜜義?」

答曰:「求佛菩提大慈悲心,攝取所起方便智慧,能如實知一切諸法同相別相勝義,名為般若波羅蜜義。」

問曰:「應說成就義。云何成就義?」

答曰:「究竟義成就義,遠離一切凡夫名為般若波羅蜜究竟義,依 般若波羅蜜遠離世間得究竟義,名為般若波羅蜜成就。此明何義? 依般若波羅蜜,得究竟無畏處。」

問曰:「若如是者,證初地時即得名為究竟成就般若波羅蜜?」

答曰:「彼依如分次第應知。此明何義?從初地來得佛菩提,以得對治法現前,以得對治法故。又初地方便攝取方便般若,離一切惡

道及離聲聞辟支佛地,如是餘地隨分相應分處應知。菩薩若能如是知者,隨順如實智般若,觀有為行他力相依,無有自體。」

問曰:「依此法有此法,依此法生此法,而重說者,有何勝義?」

答曰:「為欲示現二種因義故二種說。此明何義?有為行生因有二種。何者為二?一者、先生因;二者、共生因。先生因者,如眼識等欲生之時,先生意識相似隨順,前心不滅不容後心,要前心滅後心得生,前心雖滅與後為因,名先生因。共生因者,諸識相應,謂受等法及心不相應法,共彼法生,眼等諸法能作因緣,依止彼法能生彼法,彼法生時能與作因,名共生因。又依此法者,說先生因,生此法者,說共生因。」

問曰:「說依此法生此法者,此義不然。何以故?共生之法無定因故、無因果差別故。此明何義?共生之法,此法是因、此法是果,無有如是定因差別,以不可說此法是因、此法是果、故無定因因果差別。」

答曰:「以見故說。此明何義?亦見世間共生之法:一法是因、一法非因。猶如燈炷共照俱生,而此燈炷能作照因,照不能與燈炷作因。何以故?以此照法隨順燈炷。此明何義?以見照法隨順燈炷,而非燈炷隨順於照,以見燈炷有增有減,照亦如是有增有減,以燈炷滅照亦隨滅。又以燈炷異處去時照亦隨去,如是共生眼識等法,依眼身等、因身眼等生眼識等,非因眼識等生眼身等。又依此法者,諸菩薩等如是觀察,先時生法無有作者,唯共因緣和合而生,以有此法生此法故。

「又諸菩薩生如是心: 『因既無常,云何而得生于此法?』是故菩薩生如是心: 『依此法故而生此法。非先有法於後時生法。若先有後時生者,即是常法。』以是義故,即法生時因緣和合,無有一法

是定實者,無有定實眼識境界照了等法。以是義故,此法生時決定不從彼處而來。

「又以即共因緣而滅,若法即共因緣滅者,離諸因緣念時不住,以 是義故,此法滅時不離此處而餘處去。又依此法生此法者,謂依彼 彼因緣和合,生彼彼法、見彼彼法,示現彼法因緣而生非無因緣。 又依此法生此法者,因觀念故。

「又依此法生此法者,示現過去無明行分。此明何義?以依過去無明等二,得有現在識等八分,示現現在有分故。又依此法生此法者,示現現在有分。此明何義?依現在有分示現速有生老死分。又依此法生此法者,以無明愛取示現煩惱道,依此煩惱道生行有業道。又依此法生此法者,依於業道生餘有支,謂苦道等。又依此法生此法者,依無明行及愛取有集諦因故,生餘七分名為苦諦。又依此法生此法者,即依七分苦諦法故,生無明等五分集諦。

「又依此法生此法者,如來修多羅中說,依無明行而生識等。復有修多羅中說,依行因緣生於無明。此明何義?以生相時無明等法共心相應,及心不相應法身業口業皆悉共生,非後時生。又依此法生此法者,即生念時無明闇智共同時生,非先時生。」◎

○問曰:「說無明因緣以為初因緣,若如是者,十二因緣則為有 始。何以故?以無明前更不說有餘因緣故,於諸世間有為法中,以 彼無明為最初故。」

答曰:「以生、煩惱、業迭共因緣故。此義云何?從生生煩惱,從煩惱生業,從業生生,如是無始輪生。以是義故,世間無始。」

問曰:「自在天等所作,此明何義?從自在天及微塵等而生世間,以是義故,世間有始。」

答曰:「此義不然。何以故?常法不能生世間故,不見一法從自在 天、微塵等生,見從無常因緣中生。以不見從常法中生,見從無常 因緣中生,而汝法中自在天等皆悉是常。以是義故,自在天等不能 生法。

「又以現見異異因中生種種果。何以故?以見象馬牛羊驢駝至人天 等有差別故。以是故,非自在等作。」

問曰:「非從因緣生一切法。何以故?以見棘刺及孔雀等異異不同故,知不從無明因緣有世間生。此明何義,以無因緣有世間生。何以故?我見棘刺及孔雀等,非從因緣而有差別,如是世間非無明生。」

答曰:「此義不然。何以故?我以現見果從因生、非無因生,猶如種子,地水時熟和合生芽,非離此等種種因緣而有芽生。若離於因無因而有萬物生者,此義不然。何以故?見異異法。於異異法以比智知。世間亦爾,未曾見有離因無因而有法生。以是義故,從因生果,是故世間一切諸法非無因生。

「又有過咎,若爾不應生種種果。從種種因生種種果,不離種種因生種種果。而汝說果無因而有。若如是者,萬物應等,世間不應生種種果,以我現見,從種種因生種種果,以是義故,非無因生。

「又復有答,若一切物無因生者,應一物中一切法生,不爾便應一切物中一一各有一切物生。而此義不然。以是義故,非無因果。又復有答應無變異。此義云何?若一切物不從因生,應不變異猶如虚空。而此義不然。何以故?以變異故。云何變異?先無後有、已有還無,異生異滅,無因法中不見如是果法轉變,是故諸法從因而生,非無因生。

「又復有過,一切所作諸業空故。此明何義?若無因生一切物者, 諸所作業空無利益。而實不見有如此事,以是故非無因有果。」

問曰:「我見從智生智。此明何義?現見外物有為法中種子為因, 非過去因,如是現見內有為法,因赤白等和合而生,非過去因。」

答曰:「此義不然。何以故?以現在智從過去智而得生故。此明何義?以見智生從於過去智因而有,非無智生。若智不從前智生者,應從土塊木石等生,亦非從於異相續生。何以故?若異相續生於智者,父母亦應能生兒智。以是故,我知彼胎等諸眾生智從相續生。此明何義?以胎等智前更有智,彼胎等智不離先智相續而生,是故知有過去世因。」

問曰:「此義不然。何以故?如從攢燧、人功、牛糞眾緣和合,先 無有火而能生火;智亦如是,先無有智,因緣和合而能生智。」

答曰:「此義不然。何以故?以見餘法比智知故。此明何義?以見何等法中生法,彼法相似,能生於法,非無相似異生中見。如見從稻生稻,雖不見稻,而見從稻還生於稻,是故種稻;火亦如是,以見從於攢燧、牛糞等中生火,雖不見火,而從攢燧等中求火。如是以見從智生智,雖不見智,而知智從過去智生。是以汝說如先無火而能生火,先無有智而能生智,說一切物唯從現在因生,不從過去因生者,是義不然。以是義故,從煩惱業生世間法。此云何知?以聖人論世間人說。此義云何?以離煩惱一切聖人諸佛如來及佛弟子聲聞人等,彼如是說從煩惱業因而生世間。作如是言:『若人著貪,身作惡行、口作惡行、意作惡行。彼人依於惡行因緣,此身壞已生惡道中。』一切諸論亦如是說,從業有生。是故經言:『從明入明,從闇入闇。』世間之人亦如是說,從業有生,作如是言:『以畏一切不樂生處,遠離一切種種惡行,以求一切可樂生處,修

行一切種種善行。』以是義故,依諸聖人、依一切論、依世間人, 我如是知從業因故而生世間,非無因生。」

問曰:「因念不住何能生果。此以何義?諸煩惱業剎那不住,以煩惱業剎那即滅,是故非從諸業煩惱而生世間。」

答曰:「我見因滅而能生果。此以何義?以見因滅,依彼滅因而能生果,如於摩多隆伽果中見有酢味,而於彼子芽莖枝葉及華等中悉皆不見,而依彼子芽莖枝等相續,後時於果中見。而彼摩多隆伽果中所有酢味,非即彼因亦非異因。如是見外因果和合生如是法,如是比智知因滅已,依彼滅因有世間生,非無因生亦非異因。」

問曰:「若非無因、非顛倒因生於世間,而依業煩惱有世間者。此 云何知?」

答曰:「不知生過為作業行。此明何義?諸世間人不知生過,彼人則著五欲境界一切種種無利益事,為生世間一切種種無利益事,是故修行為得世間果報,作業非為除斷煩惱作業。此以何義?一切世間愚癡凡夫無智慧故,不能觀察,以無明闇智於無量百千種種苦惱中見有功德生,求未來世受樂果故,行功德行修戒施等諸功德行。又復有人心顛倒故,著現在世五欲境界,見未來世無有福德,是故修行無福德行殺生等業。又復有人,著三昧樂愛禪、見禪、慢禪、疑禪、增上禪等,修行一切諸通等行,是故於彼三界中生不斷不絕、從生復起一切煩惱,從煩惱故起一切業,如是世間無始以來不斷不絕。」

問曰:「若從一切煩惱而生世間行者,如來於此修多羅中,何故唯說從於無明而生世間?」答曰:「雖說無明,攝得貪等一切煩惱。此明何義?雖說無明而攝貪等一切諸過。此云何知?以愚癡人起於貪等,以無智故起於貪等一切煩惱非無過起。如經中說,無明因緣

起於貪過、起於瞋過、起於闍過。是故說彼無明根本攝得其餘煩惱 諸過,猶如世間王來王去,諸臣兵眾亦來亦去。」

問曰:「以何義故?過去分中唯說無明而不說愛,未來分中而但說 愛不說無明。」

答曰:「大境界故。此明何義?以無明遍一切境界,愛不如是。此以何義?以彼無明遍一切處,愛不遍故。又以緣於有為無為。此以何義?以彼無明緣有為法及無為法,愛不如是唯緣有為。又以緣於同不同地。此以何義?以無明緣同不同地,愛不如是唯緣同地。又以一切煩惱相應。此以何義?以彼無明一切煩惱皆共相應,愛不如是,唯愚人起非智者起。又一切苦不斷絕因。此以何義?以無明於一切苦聚以為根本。以是義故,於初分中唯說無明,依彼第二煩惱門中唯示現愛,是故於彼未來分中唯說於愛不說無明。」

問曰:「以何義故,過去世中所攝諸業,隨何煩惱能與作因?彼諸煩惱以無明名說,現在世中所攝諸業,隨何煩惱能與作因,彼諸煩惱以愛取名說?」

答曰:「以非現見、以現見故。此以何義?過去世中所有煩惱,以是遠故不可現見,是故彼中煩惱差別不可示現,以彼闇相不可得說,是故皆以無明名說。現在世生所攝煩惱可現見故,彼諸煩惱差別可說,可得示現此是愛取,此是欲取,此是見取,如是等,是故現在所有煩惱以愛取名說。」

問曰:「此說是妙說,以因煩惱業有世間生死,非自在天微塵等故。而無明等十二有支,其義云何?」

答曰:「不如實知三世中事,名為無明;無明轉起取後有因,福 業、罪業、不動業等,是名為行;依行因有生分染意,是名為識; 為彼識住,名為名色;彼清淨識之所依止,名為六入;根識境界三 事和合,對意地法是名為觸;依觸而生愛、不愛二顛倒念受,是名為受;見著受等集樂名愛;依止於愛求有斷有,取我依止樂諸煩惱隨順煩惱,是名為取;取能轉起取後生因身口意業,是名為有;依止行有取後世身,是名為生;依止生身增長熟變,是名為老;先得身壞,是名為死;遠離不離愛不愛事求供養等從意地生,焚燒自心,是名為憂;依懷憂心說愛功德,內心愁縛種種悲言名為啼哭;依色識身共意相應,非愛樂受,是名為苦;唯意識身意地相應,是名為愁;於愛不愛二種境界,或有求有或不求有求資生故受種種苦,其心逼惱,是名為極。」

問曰:「無明緣行,云何名行?」

答曰:「依止容受伴侶觀起隨順共生,名為行義。」

問曰:「應釋因緣名,云何名因緣?」

答曰:「能成就果是名為因;依此法故能顯彼法、因此法故能生彼 法,是名為緣。」

問曰:「何故但說無明緣行,而不說言無明因行?」

答曰:「為攝一切諸因緣故。若說無明因於行者,但攝因因緣不攝 因緣,是故不說無明因行。以四因緣無明等共能因緣行,是故唯依 因緣名說,以能攝取四因緣故。」

問曰:「行亦能作無明因緣。若如是者,何故但說無明緣行,而不 說言行緣無明?」

答曰:「以有二義:定、不定故。此以何義?以無明因定緣於行, 而非業行定緣無明。何以知之?以阿羅漢雖復有業而無無明,是故 非業定緣無明,是故不說行緣無明。又依無明因緣有業,以是義故 依彼無明因緣有業。若如是者,唯依無明因緣有業,不應遠離無明 有業。而實遠離無明有業,是故說依無明緣行,不說依行緣於無明。」

問曰:「以何義故,已受果業以行名說,未受果業以有名說?」

答曰:「未受果業但有有為分,是故說有。以畢竟有故,以未來世 畢竟得果,業體雖滅而畢竟有,以必能與未來世果,是故名有,以 有名說。已受果業、已受有為分,是故說行以得受果,是故名有, 以有名說。

「又復有義,何故名有?以依此法能生名有。此以何義?隨何等業能畢竟生未來世果,以有名說。隨何等業非是畢竟未來世有,如鴦瞿離魔羅等業未曾有故,以行名說。是故經中行緣業果,以識名說,非生名說。何以故?以彼行業非是畢竟生有支故。此以何義?以現身中受果報業,彼業行緣能生識支,而不能生彼生支故。又以見有力無力故。此以何義?何故名行?能辦事故。過去世生所作諸業,見彼有力以能成果,是故彼業以行名說。現在世生所作諸業,未見彼力,以未成果,彼業果報在未來故,是故彼業不得名行,以有名說。」

問曰:「以何義故名為不動?」

答曰:「異地不能與果報故,名為不動。此以何義?如欲界業於異地中能與果報,隨以何等善根業道應生人中,即彼善業依願求心,乃至生於他化自在,如如來依《功德生修多羅》說:『又隨何等惡不善業應生地獄受果報者,即依彼業人中受苦。』如如來依《鹽喻經》說:『色無色業不得如是。』此以何義?初禪地業不生二禪,二禪地業不生初禪,如是餘地皆亦如是應知。是故佛說色無色業名為不動,又諸蓋障所不能動,故名不動,如密室燈。」◎

彌勒菩薩所問經論卷第八

後魏天竺三藏菩提流支譯

◎問曰:「行以名色二因緣識而重說者,此有何勝?」

答曰:「初託胎識行為因緣,以彼能作種子義故;已種種子名色為因緣,以能和合成就事故,以二因緣住持成就依止,能取境界觀故。又行因緣而業得名,是故經中說諸業因為能生因,名色因緣而愛得名,是故經中說彼愛緣為能生緣,以二因緣於境界中依境界住。又行因緣初生心得名,名色因緣已生,六入未成就六入得名。又行因緣依一門行。此以何義?彼行因緣唯意門行,名色因緣依二門行。此以何義?名色依於身根意根二門而行,以二因緣依六門行。又行因緣唯惡道中以依罪業能攝住故,如經中說,彼諸眾生於惡道中乃至惡業未盡不死,業盡乃死。如是等名色因緣,人及天道欲色界中,以彼處有名色二事,無色界中無二因緣。」

問曰:「如來於彼《城喻經》中、《大因緣》等修多羅中說,依名色因緣於識。何故於此修多羅中而說依識因緣名色?」

答曰:「名色因緣依識而有。此以何義?以實有識,名色與識迭共相因,而依識有,有名色有。如依所依是故有依。此以何義?如王及臣迭共相依而王為勝,以王去時臣亦隨去。此亦如是,識與名色迭共相依,而識為勝,是故依識而有名色。若識因緣不託母胎,諸心數法則不得有。以識託胎,諸心數法皆亦隨從。又因根本心成歌羅邏,以赤白等和合則能成歌羅邏,為成眾生。彼處識心為根本因,如大因緣法門中說,佛告阿難:『若彼識心不託母胎,彼歌羅邏及名色等亦不成就。』是故識為諸苦種子,為欲示現根本義故,是故唯說識緣名色,不說名色因緣於識。」

問曰:「有人說言:十二因緣有於時節,彼人依識因緣名色義則不成。何以故?無因緣故。此以何義?為識滅已然後能作名色因緣、為識不滅能作因緣?若識滅已作名色因緣,此義不成。何以故?以滅種子不能與芽作生因緣故。又復有過,中間斷絕眾生體故。若識不滅能與名色作因緣者,一眾生身於一念中並有二識。以是義故,識不能作名色因緣。」

答曰:「相續不斷不絕,因緣如燈焰,體相續不斷。此以何義?如 焰相續不斷不絕而能有用,非先焰滅而後焰生。若先焰滅後焰生者,是則滅已後時更生。又復有過,後焰生時無因而生。又復有過,若無因生則應常生。又亦非是先生焰住後餘焰生。若先焰住後焰生者,先焰便應第二念住,而佛法中無如是義。又復有過,先生之焰無因而生。又復有過,焰應增長。又復有過,應多焰生。又亦非即先焰住時更生餘焰。何以故?不容受故。此以何義?隨先生焰,以何等處、何等因緣?即彼生處、即彼因緣,即先生焰即時俱謝,是故得容餘焰餘因緣。又復有過,前燈焰滅、後燈焰生,不從無火因緣而生。此義不然。何以燈炷焰前後次第不斷不絕相續而生?如是識名色等次第生滅能成因果應知。以是義故,依識因緣能生名色,因果義成。」

問曰:「名色因緣有六入者,以何等因?」

答曰:「以彼因故。何以故?以色清淨因緣五入,以名清淨因緣意入,故說名色因緣六入。」

問曰:「若以名色緣六入者,此義不成。何以故?以雖有彼而無彼故。此以何義?歌羅邏等時雖有名色、無六入等,以是義故,此義不成。又復所以此義不成,以眾生有盲聾等故。此以何義?若名色能作六入因者,則不應有盲聾眾生,一切悉應具足諸根。」

答曰:「此義不然。何以故?不離彼有成,猶如雲雨。此以何義? 如汝天雨,若先有雲後時雨者,非離雲雨;亦有有雲而無有雨。如 是六入若有名色,有六入者非離名色,復有名色而無六入。」

問曰:「以何義故,有彼名色而無六入?」

答曰:「以諸因緣不具足故。此以何義?猶如眼識,如實有眼,以 諸因緣不具足故不成眼識。又復猶如實有種子,以諸因緣不和合故 不能成芽。此亦如是,歌羅邏等時中因緣不具足故,眼等諸入亦不 具足。」

問曰:「彼諸因緣云何具足?」

答曰:「以煩惱業,名色和合淳熟故成。」

問曰:「云何得知煩惱亦是六入因緣?」

答曰:「以阿羅漢不復生故。此以何義?以阿羅漢雖復有業而無煩惱,是故不生。以不生故無有六入,是故得知,煩惱亦是六入遠因業,亦是彼六入因緣。何以故?以成盲等故。是故雖復實有煩惱隨種類生,具六種業有盲聾等,是故知業亦六入因。又以十二入有種種故。此以何義?以入種種迭共不同,但一眾生一身體中種種不同,何況種種眾生身中諸業不同,家力色命皆悉不同,如是等以諸眾生家力色等一切差別此皆依業。以是義故,彼業亦是六入因緣,名色亦是六入因緣,以彼六入依種子故。此以何義?以雖復有煩惱業等,名色種子生於六入,不離名色能生六入,如不離子而能生芽,是故得知近因名色生於六入,亦依彼業生於六入。何以故?以雖有彼而無彼故。此以何義?以雖復有煩惱業等,而彼名色不具成就。如歌羅邏等時中無眼等入,而依彼故成就六入,如始結子終能成果。是故得知煩惱業等名色淳熟,而能作彼六入因緣。」

問曰:「汝說因緣猶不具足。何以故?是中不說外因緣故。此以何義?唯除聲入。名色等緣共六入生。若如是者,但說六入因緣。不具足說名色因緣,此是過失?」

答曰:「彼不須說。何以故?以二處見故。此以何義?以彼外入二處見故,以依眾生攝、依非眾生攝。此以何義?此中但依眾生次第說彼十二因緣,而不依彼非眾生說十二因緣,是故但依眾生所攝入說,不依非眾生說。以是義故,此中但依眾生所攝內因緣說,而非依彼外因緣說。」

問曰:「若爾,不應說於名色。此以何義?若如是者,名色有支中不應說名色,以色二處見故。」

答曰:「實如所難。雖然,若於彼處不說名色,但言以名緣六入者,如是不說五種色入,彼六入中色亦清淨,非但名色入清淨。此以何義?應說可見色等入緣,是故彼處亦說色名。以是故,說識因緣名、名緣意入如是等,如是三時無有分別,是故如來於此中說,是名正說。」

問曰:「何故不說外入因緣?」

答曰:「說眼等者,是即成說。此以何義?此修多羅中具足成就說眾生體。此復何義?隨何等處眼等諸人,彼處必有色等外入。何以故?以不遠離色等境界有眼識等。以是義故,說眼等入則已攝得外色等入,是故不別說外入等。又以依內入得名字故。此以何義?依內入故得眾生名,非依外入。以是義故,唯說內入不說外入。」

問曰:「何故名觸?」

答曰:「對到名觸。」

問曰:「此以何義?」

答曰:「於念境界中識相對法故,以眼識等於彼色等諸境界中彼此相對,是名為觸。復有觸者,近對和合到一處等,名異義一。又和合生意地法,故名為觸。」

問曰:「說觸因緣猶不滿足,以三種法和合因緣而生觸故。此以何義?以有三法和合生觸,佛如是說。此中唯說六入因緣而生於觸,是故此中不具足說生觸因緣,此是過咎。」

答曰:「以說內因緣攝得外故,如彼鼓聲。此以何義?如人鼓桴和 合生聲,唯說鼓聲,如是三法和合生觸,雖依內說而攝得外,是故 無過。又不同義如種子芽。此以何義?如雖有時及地水等和合能作 生芽因緣,而說種子名為勝因。子能生芽是芽勝因,此是稻芽此是 麥芽不說共因。觸亦如是,有不同義,雖有三法和合故生,唯說內 入不說共因。

「又以勝因故。此以何義?雖有三事和合生觸,以依根能生而說內 因,以彼勝故,以依根故諸識能生,以盲聾等無識等故,以色等法 識境界故。是故依根三法和合能生彼法,雖三法生而根是勝,是故 如來唯說勝法如說六入。又雖說六入而攝得三法和合成觸,以說入 名即說六識,以彼相隨,以說眼等入即攝色等入。何以故?不離色 等入有眼等入。以是義故,如說六入,此亦如是。」

問曰:「六入緣觸,此是何因?」

答曰:「以盲等人無眼等觸,餘者有故。此以何義?以有眼等根有 眼等觸,離眼等根無眼等觸,如盲等人唯有意識,此亦如是六入緣 觸。」

問曰:「依觸緣受,此是何因?」

答曰:「以樂受等境界和合有樂受等。此以何義?如人患熱依熱逼惱,求於雪冷摩尼珠等及以蔭涼。又如有人依寒逼惱,求火求衣求溫水等一切暖觸。」

問曰:「觸緣受者,此義不然。何以故?共觸生故。此以何義?觸 共受生,以是義故觸緣受者此義不成,如兩角共生,右角不作左角 因緣、左角不作右角因緣。此亦如是,是故應依餘因緣生,非觸因 緣。又若共生而觸能作受因緣者,以何義故,受不能與觸為因緣? 以受觸生相應因故。」

答曰:「雖復共生,而一是因,一非是因。此以何義?有二種法,雖復共生而有一法能作彼因,非第二法作彼法因,如明與焰雖復共生,焰是明因、明非焰因。又如日與光二法共生,而日能與光明作因、光明不能與日作因。又如芽共生芽作影因,影非芽因。觸亦如是,雖共受生,觸為受因、受非觸因,是疑已斷。復有異義,我此法中非觸共生次第因緣。此以何義?我此法中非受與觸一時俱生。云何而生?依過去時,即與後時受法作因次第緣生。此云何知?以說一因。此以何義?以說依觸因緣生受,不說依受因緣生觸。此以何義?若此二法共俱生者,應說迭因。以是義故,說次第緣,不說一時。」

問曰:「依受緣愛,此是何因?」

答曰:「以受為因,欲取樂故而生於愛。」

問曰:「若如是者,苦不應生?」

答曰:「以求離故。」

問曰:「求樂受者見樂故求,不應求苦,以不用故。」

答曰:「雖不求苦而亦有愛,以不欲得彼苦受故,求欲離苦彼即是愛,是故苦受亦愛因緣。又樂受者欲愛因緣,苦受遠離有愛因緣。此以何義?如人有苦依苦逼惱,不知無力為殺害身,以不求苦以不求樂而愛因緣。又依無明盲故取苦,如彼渴人闇夜飲於糞和合水。此亦如是。」

問曰:「色等境界皆是愛緣,何故但說受為愛緣?」

答曰:「為樂受故求彼色等。此以何義?樂受之生必有伴侶。以是 義故,於色等法皆生愛心,受為勝因非色香等,是故但說受為愛因 不說色等。」

問曰:「取有何義?」

答曰:「取近染著皆名為取,求於有支及資生等一切染著,以得染著不相捨離名之為取。此有四種。何者為四?欲取、見取、戒取、我取。又欲取者,貪於五欲境界功德。戒取觸者,謂以持戒取三種見:見、取身見及以我見。又執著我,名為我取。彼人著我為我求樂,是故求彼五欲境界求諸天樂,或取欲見諸天苦行如是等法,是名見取。若已求得五欲境界貪著彼法,是名欲取。著未來世欲境界因,不能遠離五欲境界。如是持戒,是名戒取。又著己身隨順二邊,是名見取。此義云何?若墮斷邊,即便堅著五欲境界,是名欲取。若墮常邊,貪著五欲為勝生處,如是持戒是名戒取。」

問曰:「愛緣取者此是何因?」

答曰:「不足愛故更求增長,如飲醎水轉增長渴。又依愛故有四種取。此以何義?依愛緣故求於現在五欲境界,如經中說依愛因緣求於諸欲是名欲取。又依愛故求未來世五欲境界,為彼愛故起於持戒是名戒取。以彼但求五欲境界,若以求得五欲境界,不欲捨離求諸

天故,好日祭祀是我所欲,如是著我名為我取。是名依愛因緣於取。」

問曰:「以何等愛、緣何等取?」

答曰:「欲愛欲取,有愛能取;戒取、我取,離有支愛能取見取。 又復眾生我愛見取、生愛戒取、受愛欲取,於一切取貪著見取。又 四取中欲取、戒取二取是愛,餘二以為無明根本。」

問曰:「有義云何?」

答曰:「此能生故,依此能生此,能勤修依此法故能生餘法,是故名有。」

問曰:「依有緣生,此是何因?」

答曰:「依業有生,如向前說,依行有識此中亦爾,應具足說。」

問曰:「煩惱亦是生支因緣,如經中說愛因能生,何故唯說有因緣生不說取緣?」

答曰:「依勝生因故如是說。此以何義?此中唯說生法勝因。云何為勝?此是地獄、此是人、此是天。如是等此種種身業為近因而非煩惱,彼種種因復有已生、同類生中各有差別,謂家力色、長壽短壽、有病無病、受用資生一切差別。此中亦爾,業種種故,知是近因非煩惱也,是以說有因緣有生,非取因緣。」

問曰:「若有能作生因緣者。何以故說有因緣生,而不說生因緣於有?」

答曰:「以有定、不定故。此以何義?以有有支必有生支,有生支者不必有有。猶如依彼第二諦故必有初諦,而不必因有初諦故有第

二諦。若不爾者,畢竟無有解脫因緣,是故說依有支因緣必有生 支,非生緣有。」

問曰:「老者何義?」

答曰:「消皺力減,名之為老。有人說言:所謂老者以變異故。此義不成。何以故?以不住故。以有為行剎那不住,若有為行念不住者,云何而言變異名老?又復有過,法若變者便應第二剎那中住,法若第二剎那住者非佛法義。又復有過,言變異者捨於實體,若即前法有變異者,彼法便應即捨本體。又若彼法不變異者,則不得言有變有異。若法不捨彼本體者,亦不得言變異名老,是故不得言有轉變名為老也。先說老相,彼是老義。」

問曰:「心心數法云何知老?」

答曰:「以見心法依止法異,所謂諸根四大損減、思惟念薄、忘失所有諸法門等,聞聲不了、見境界難,見如是等知心有老。」

問曰:「死有何義?」

答曰:「死者捨命終亡謝滅,異世去等是名為死。如是此死及先說 老,此二合故名老死支。又復有言:根四大等後時損減微細難別, 是名為老,破壞名死,如柯漸盡。又四大破壞是名為老,散盡名 死,如朽故車破壞散盡。又於五陰隨順滅故,是名為老。滅名為 死,如故舍壞。」

問曰:「生緣老死,此有何義?」

答曰:「壞彼法故得有此法,若無彼法亦無此法。此以何義?如初 作瓶後時朽故。又先作瓶後時破壞。此亦如是,有眾生生,後有老 死,非是不生,是故說依生緣老死。」 問曰:「若生念中即時死者,彼中云何生緣老死?」

答曰:「命滅。此以何義?彼處有命損現前命,五陰滅故是名為 老,猶如彼雨有雲故雨,無雲無雨,亦有有雲而無有雨,彼處亦 爾。」

問曰:「何故有為三相法中,一處唯說生為生支,一處說老以為老支?」

答曰:「隨順義故,法欲生時生能隨順,法欲滅時老支隨順。又老死支隨順壞法,生支與彼老死相違。老死二法迭共隨順。言隨順者,隨順破壞故名為老,死亦如是,是故老死合為一支,生者別支。」

問曰:「何故不說憂等為支?」

答曰:「不遍一切諸眾生故。此以何義?憂等諸法不遍三界,以是義故不說為支。」

問曰:「無明滅則行滅者,有何次第?」

答曰:「如來次第說,無明等十二因緣能生於有,以諸眾生不能識知十二因緣,墮斷見故。如來次第說無明滅餘亦皆滅,以諸眾生不能見知無明因緣,墮常見故。又如先說,云何世間有以不見知十二因緣墮於無邊?以是義故,如來說云何世間滅?以不見知何等法故墮於有邊。以是義故,如來次說。如如來《迦旃延經》中說。又已說身見集諦道諦,未說身見苦諦滅諦,是故欲說。又已說染諦,未說淨諦。又已說縛諦,未說解脫諦,今欲說故,是故說言無明滅行亦滅如是等。」

問曰:「此諸因緣有於幾種?」

答曰:「略說四種。何者為四?一者、有時十二因緣;二者、剎那;三者、次第;四者、不斷絕。時者,到時名因緣時。此以何義?無明時者,謂過去時。生煩惱者是無明時。言行時者,過去時業是名行時。言識時者,謂託生心共眷屬生是名識時。名色時者,未和合成即歌羅邏、安浮陀、枇尼堅支等,如是時中未生眼等五情諸根,六入未滿,彼時生體是名名色時。六入時者,以生眼等諸根滿足,六入諸根未能有力作彼心心數法依止,是名六入時。言觸時者,隨何等時諸根於彼心心數法能作依止,而不能作分別苦樂,亦不能作好惡諸事,未有勝行,是名觸時。言受時者,謂受苦樂分別苦樂,攝好惡事愛食非愛,欲資生等未有取力,是名受時。言愛時者,愛欲資生行非分別有無,是名愛時。言取時者,知有無分別,求如是起,是名取時。言有時者,求於此世未來世中五欲境界,追求推覓,為未來生起種種業,是名有時。言生時者,此生已退,即次後生所託生處,是名生時。老死時者,自此以後破壞諸根,名老死時。

「言剎那者,名色等支名為剎那,以一念中具足一切十二有支。此義云何?如人依止貪心殺生,彼處所有迷愚癡等名為無明;彼處所有相應思心是名為行;彼處所有相應意法是名為識;彼處所有共識生法相等,四大及依四大所生四塵,如是等法名為名色;彼處所有依入作業而非離入名為六入;彼處所有相應對法,是名為觸;彼處所有相應覺者,是名為受;彼處所有相應貪心,是名為愛;彼處所有不捨愛心,是名為取;彼處所有身口意業,是名為有;彼處所有如是等法所起之法,是名為生;彼處所有諸法變異,是名為老;彼處所有諸法散滅,是名為死。

「有次第者,無始義故。此以何義?以彼因果不斷絕故,以是義故 不知其始。 「不斷絕者,以彼因因不斷絕故。此以何義?遠來義故。又復非但 十二有支能生因緣,以彼一切有為諸法名為因緣。」

問曰:「深心等法有何次第?」

答曰:「以成就一切勝功德故,以一切法中不失菩提心以為根本故。此以何義?於諸菩薩摩訶薩修行功德中,說彼深心以為根本,以諸菩薩成就深心,以為不失菩提心因。如深心,諸行亦爾,自然為欲利益一切眾生修行,是以如來為欲示現如實修行次第義故,說深心後次說行心。

「又以菩薩成就深心、成就行心,然後於他利益修行,為欲示現如 是勝義,說修行後次說成就捨心。又以菩薩持戒布施等如實修行相 迴向勝法,依如是義示現修行助菩薩道,是故次說成就迴向。又從 持戒乃至迴向非定善根,次欲示現勝三昧法,欲令眾生住慈悲等諸 善根中。以是義故,說迴向後次說成就大慈悲等,已置定法妙樂善 根,為欲離彼貪著心故,說慈悲後次說方便,以有方便故有智慧明 見諸法。以是義故,不墮聲聞辟支佛地入菩薩位,是故如來說方便 後次說成就般若波羅蜜。

「又復略說成就深心乃至方便, 示現成就助道功德, 究竟成就般若 波羅蜜者, 示現成就助道智慧。

「又成就深心乃至方便, 示現成就菩提功德道, 究竟成就般若波羅 蜜, 示現成就菩提智慧道。

「又成就深心乃至迴向, 示現成就戒身, 慈悲二法示現成就定身, 方便般若示現成就慧身。

「又成就深心即是示現成就直心,自餘七句示現成就修行。

「又成就深心、成就行心示現戒家; 成就捨心成就迴向, 示現施家; 成就大慈成就大悲, 示現滅家; 成就方便成就般若波羅蜜, 示現智家。如是有礙無礙等一切諸法, 諸餘一切修多羅中廣說應知。此修多羅依諸菩薩摩訶薩學戒義說, 如是諸菩薩摩訶薩八萬四千無量無邊諸法門等, 皆應類知。」

彌勒菩薩所問經論卷第九

此經舊為六卷。《開元錄》作五卷,子注或七卷、或十卷。據此, 今開初卷為二,總為七卷。即釋《大寶積經·第四十一會》是也。

CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".